

سأفة وقصيدة

الجزء الثالث

الراوي

محمد بن علي الشهران

ح مكتبة العبيكان، ١٤٣٤هـ

فهرسة مكتبة الملك فهد الوطنية / ثناء النشر

الشهران، محمد علي

سألغة وقصيدة: الجزء الثالث. / محمد علي الشهران - ط٣. - الرياض، ١٤٣٤هـ

٢٤٦ ص؛ ١٦,٥ × ٢٤ سم.

ردمك: ٩٧٨-٦٠٣-٥٠٣-٥٣٩-٢

أ. العنوان

١- القصص الشعبية السعودية


١٤٣٤ / ٥٦١٦

ديوي ٨١٣, -٩٦٥٣١

حقوق الطباعة محفوظة للناسر

الطبعة الثالثة

١٤٣٤هـ / ٢٠١٣م

الناشر  للنشر

المملكة العربية السعودية - الرياض - المحمدية - طريق الأمير تركي بن عبد العزيز الأول

هاتف: 4808654 فاكس: 4808095 ص.ب: 67622 الرياض 11517

موقعنا على الإنترنت

www.obeikanpublishing.com

متجر  على أبل

<http://itunes.apple.com/sa/app/obeikan-store>

امتياز التوزيع شركة مكتبة 

المملكة العربية السعودية - العليا - تقاطع طريق الملك فهد مع شارع العروبة

هاتف: 4160018 / 4654424 - فاكس: 4650129 ص.ب: 62807 الرياض 11595

جميع الحقوق محفوظة للناسر. ولا يسمح بإعادة إصدار هذا الكتاب أو نقله في أي شكل أو واسطة، سواء أكانت إلكترونية أو ميكانيكية، بما في ذلك التصوير بالنسخ «فوتوكوبي»، أو التسجيل، أو التخزين والاسترجاع، دون إذن خطي من الناسر.



المحتويات

الصفحة

الموضوع

٧	المقدمة
٩	اللي يبيننا عيت النفس تبغيه
١٥	مشعان وعبد المعين
٢١	البشت البدرى
٢٧	شديد البدو
٣٧	وصف الجسمس
٤٥	مكانة الأخ
٥٥	ابن مزيد وابنائيه
٦٣	الخليفي شاعر قطر
٧٩	قرصة الحبيبة
٨٣	ابو ماجد وابنه
٩١	صياح يتيم
٩٧	العجيمي عند الديان
١٠٧	الأم وزوجة ابنها
١١٥	من تاب تاب الله عليه
١٢٣	الشاعر الغزلي محمد الفيحاني
١٢٩	الزواج من أجنبية
١٣٧	قصة بداح العنقري

- ١٤٣ من قصائد الغزل الجميلة _____
- ١٥١ الجار ولو جار _____
- ١٥٧ تمر الصوام _____
- ١٦٣ القهوة _____
- ١٧٣ بوادر الشيب _____
- ١٨١ يا ناس خلوا كل واد ومجراه _____
- ١٨٧ حسن الوفا _____
- ١٩٣ من ضحايا الغرام _____
- ١٩٩ مغيب القمر _____
- ٢٠٥ حرص الآباء على الأبناء _____
- ٢١٣ غربة دباس _____
- ٢٢٧ الصقر الجريح _____
- ٢٢٣ احد عساه القرص ومفطح الحيل _____
- ٢٢٧ الغويش اليتاما _____



مقدمة

بعد أن لاقى الجزء الأول والثاني بطبعاتهما المتعددة الرواج الكبير غير المتوقع وتلقاه القارئ العزيز بقبول منقطع النظير رأينا في هذا كله ما يدفعنا لإصدار الجزء الثالث من الكتاب (سألقة وقصيدة) على نفس النهج والأسلوب نفسيهما اللذين انتهجناهما في الجزء الأول، وهو أن الرواية تقرأ، وكأن الراوي يلقيها على مسمع القارئ، حرصاً منا على امتناع القارئ العزيز، ونكرر القول إن في مثل هذا الأسلوب متعة وسهولة في متابعة القصة - أو بتعبير الكتاب السألقة - وزيادة في اجتذاب انتباه القارئ العزيز؛ خاصة من محبي ومتذوقي هذا الفن من الرواية وفن الإلقاء، ولا شك أن سماعها من الراوي بصوته أبلغ في إيصالها إلى المستمع وأكثر متعة ومتابعة إلا أن اتباعنا لهذا الأسلوب من العرض قربنا إلى ذلك بالقدر الذي يكفل للسألقة بأن تحظى بالقبول والرضا من قبل القارئ العزيز.

وأود الإشارة هنا إلى أن هذه السوالمف ليست فقط للتسلية بل إنها لتبصير الأجيال وخاصة الشباب منهم؛ لينهلوا عما فيها من عبر وقيم وحث على مكارم الأخلاق، والتحذير من بعض السلوكيات والممارسات الخاطئة، ففيها توجيه غير مباشر لهم ولغيرهم.

ونكرر تأكيدنا وتأكيد الناشر أن في مثل هذا الأسلوب محاولة لإرضاء عشاق هذا الفن، وليس كما أشار بعضهم بأن الأسلوب المتبع يتعارض والحفاظ على اللغة العربية والحرص على الذود عنها، فلم نك يوماً من الأيام دعاة هدم للغة أو لإضعافها، وحاشى لله أن ننحرف إلى هذا الدرك من التوجه والمفهوم،

ولورأينا أن في هذا القول - ولو شيئاً يسيراً - من الصحة لتوقفنا عن إصدار الكتاب، ولكننا أول المنافحين والذائدين عن لغتنا الجميلة.

إن ما يهمننا هو الاستمرار بتقديم ما يرضي عشاق هذا الفن وهم كثر، والذين باقتنائهم للأجزاء الثلاثة عبروا عن ثقتهم بالمؤلف والناشر؛ مما كان له أطيّب الأثر وأحسنه.

لهم منا جزيل الشكر والامتنان، والله ولي التوفيق.

المؤلف

محمد بن علي الشهران



اللي يبيننا عيت النفس تبغيه

هذه السالفة جرت على الشاعرة المعروفة/ نوره بنت حوشان بن علي بن دخيل الله الحوشان من أهل عين الصوينع (بمنطقة السرّ) في عاليه نجد عاشت في بداية القرن الرابع عشر الهجري .

تزوجت من الشاعر/ عبود بن علي بن سويلم العازمي وهو قريب لها ولكن بعد مضي الزمن وانجابهها منه بولدين وبنت حصل بينهما اختلاف بسبب حرارة زوجها فاستعجل وطلقها طلاق لا رجعة فيه إلا بزواج من آخر

فندم ندم شديد بسبب استعجاله في أمر الطلاق (وهذا شأن كثير من الشباب هداهم الله هذه الأيام) .

والطلاق أبغض الحلال إلى الله سبحانه وتعالى الحاصل أن الزوج تلخبطت أموره في مزرعته التي كان عايش معا فيها وانحاس وتعطل كثير من الأعمال التي كانت هي قائمت بها هي مثل حلب المنايح من أغنام وبقر وملاحظة أمور المعيشة في بيت المزرعة لا سيما وأن المزرعة خارج القرية لأنها بعد الطلاق رجعت لبيت يعودلها بعد والدها في الديرة المهم أن الزوج انحاست أموره وصابه مثل الهيام عليها وكثرت عليه الهواجيس والانزعاج والهوم وصار يطلع للجبال اللي حول المزرعة ويهوبل ويغني على فقدها ويتمنى لو ترجع له ويخاف يأخذها غيره ويمسك عليها وهو هائم بحبها وحتى هي كذلك تببه بس المشكلة الحرارة والعجلة منه دائماً وخاصة في النهار ولا هو من العصر ووراء حليل تعرفه هي . ومع طول

الغياب وعدم شوف لها صار يغني فيها ويقول :-

يامل قلب حب نوره تغشلاه

يومي به اوماي الهواء للشراعي

ان نمت عندي وان تنبتهت مالقاه

ما اسج عن طرياه لو كان واعى

قلبي غداء به داه ما يعرف دواه

وان جاه من ينهاه طقه جلاعي

عليك يا للي كن وضح ثناياه

بردي قنوف يوم هل النواعي

ياللي تعرف الحب هو ويش معناه

هو خلف ولا ولف ولا انه زاعي

ثم تمضى الأيام وهو لا يزال في حسرة وفي حيرة من أمره ما يدري وش يسوي يحاول يقابلها عند سوق في مدّي عن الدلو إلى جت تروي يسلم عليها ما ترد تسفه ما ترد عليه تنطنش عنه تبي علشان يستأدب ولا يتعجل في أمور الطلاق الطلاق ما هو ب لعب (مثل السيف ما ينلعب به) .

ثم مضت الأيام عليه وهو لا يزال في حسرة وحرقة وذات يوم تعلق إلى رأس جبل حول مزرعته وأخذ يغني هذه الأبيات على فقده لنوره ويقول :-

أمس الضحى عديت راسي الجذيبه

لا عاد مرقها حضر كل ما غاب

الدمع من عيني تزايد صبيبه
صبيب محناب تعلاه سكاب
ان مت يا اخواني تراني صويبه
تراي عند منقش الكف بخضاب
زاوي حشاه من البتوت اللبيبه
مستقطعن الزين عن تلح الأرقاب

اعزائي

ماش كل هالقصيده وها التوجد عليها ما فاده بشي يعني ما نفعه القصيد ولم
يرد له غايب .

نوره الحوشان مستقرة في بيتها بالديره وعيالها عندها حوشان وطامي ومنيره
وحرمة مليانه عقل ورزانه وذات منطق جميل وحشيمه وفيها دين وعطف على
كبار السن والفقراء والمقطوعين وعلى جانب من الوقار والهيبه والدين وجميله
وحسنه المظهر وصاحبه دبره جيده في بيتها وعيالها وهذه الصفات هي المطلوبة
والمرغوبه عند كثير من الناس العقلاء فتقدم لها الكثير من الناس يخطبونها
للزواج خاصة كبار السن من أهل ديرتها لكن رفضتهم بامل العوده إلى زوجها
لأنها هي تحبه بعد وتبيه .

المهم أودها هاك الشايب من أهل الديره ويتردد عليها وعلى بابها ويشيل
عيالها ويحببهم ويجب لهم ولها هديا ويشيل البنية الصغيرة ويقول وهي تسمعه
من وراء الباب يحليل ذا لبنيه يا حبنني لها وهو يكذب ابغض ما يشوف البزران

لكن يبي لين يتملك بس شايب قضع كنه (عرق ارطاة) لكنه نشيط وغني عنده تمر وعيش ونخل ويقولها والله أني لأغنيك أنت وعيالك وأنا أنزل عليكم واطلل على العيّل وأصير في مكان أبوهم الله لا يهتمهم (كذوب الخبيث) بس يبي لين يقطب يدها وتطيح في حبالته ثم يسوم عيالها سوء العذاب . يقمع روسهم بقاء اصبعه إلى مشوا قدامه . صاير ملمسه ملمس داب كل يوم يتردد عليها وينقل عليها من نخله مرة خضره ومرة عيش ومرة تمر ومرة فرايح لها ولعيالها ويقولها شوري عليك خذيني قبل اهون قالت له ابرك ساعه ان تهون طس في بليس أنا ابعود على رجلي أنشاء الله قم بس فارق عن بابنا وقالت ثلاث ابيات بعدها اقتنع انها صدق ما تبيه تقول :

قلبي يحب صويحيبي مير يكونين

مكوى يبين الجرح به قبل دمه

ابغيه لو هو يطبخن ثم يشوين

يبرد لهيب القلب ضمه وله

يا حلو قولة هيش يا ويش تبغين

احلى من الورع المغاغي على أمه

فلما سمع منها هذه الأبيات اقنع تماماً وعرف ان مالها رغبة في الزواج من غير زوجها عبود بن علي بن سويلم بتاتاً ما تبي إلا هو فرجع الشايب ادراجه ولم يعود عليها .

زوجها الاساسي عبود بن سويلم لما قطع الياس منها وعرف انها ما رياح ترجع له الا بزواج من آخر أو عز الي ولد أخوه محمد بن سويلم واحد أسمه

خالد بن محمد بن سويلم وطلب منه انه يأخذها مؤقت حتى يحللها له وفعل ولكن بعد ما تزوجها خالد رغب فيها وأمسكها ولم يطلقها وهي ما تبييه بعد لكن على أمل أنه يطلقها لكنه أمسك بها وحطها في مزرعة قريبة من مزرعة عمه (اللي هو زوجها السابق).

وكلما مرت رايحه للديره جاء بها الطريق على مزرعة زوجها السابق عبود ابن سويلم اللي هي تحبه وتبنيه وتتمناه وذات يوم تعلت على جبل يطل على مزرعة زوجها السابق منتظره أولادها يسلمون على أبوهم عبود بن سويلم وشاهدة المزرعة والسواني وهي تصدر وزرعه اللي هو زارع والمعاويد اللي تصدر هم تحلبهن قبل والنخل والمكان وتذكرت وتمنت

للتوبه باب مفتوح
 مفتوح وعنده وكيله
 والله في حكمه ومراده
 في الدقيقه والجليله
 ترى كل امر تعسر
 في هالدنيا المستشيله
 ما على الله شي كايد
 اسرع من عسره تسهيله
 الله ماحبي للخير
 والشر الله ما بغضي له
 بقعا غثتني مغثه
 كثر المغثه وشي له
 يابقعا وش لك باكلافي
 تصدير بيلا تبطيله
 رذلتيني في شبابي
 والتباب اكود ترذيله
 لبستيني ثوب شين
 ثوب مكروه تفصيله
 يوم ان الفقه يطاوع لك
 هو وشهو لك من قبيله

قالت هذا اكبر عيلاني
 اللي يصغي لي واصغي له
 ترى هذا شوية حربي
 اللي مدعيكم سحيله
 وانا يمينه ويساره
 وازيد الحمى مليله
 يابقعاه قوه لشرع الله
 اللي للغاوي دليله
 قالت لي روح يا جاهل
 كم غريب وري له
 يابقعاه ماشفتي حظي
 اللي قاويني بالحيله
 خلاني في الريد كني
 تميل كمل بنزيله
 الله ماهيلي هبله
 ابي من بقعا تشكي له
 مثل اللي يزرع في الطايه
 ماردي منه الا عميله
 بقعاه لاقتني في السوق
 معها ملقوف تغضي له

قالت له قم طق ذراعاه
 عن هرجه هذا تنكيله
 قلت الله يقطع هالهرجة
 من ذا جهيده واعزّي له
 الله ياحيف في بقعاه
 ترى ماكل تصفي له
 احد تركض له بالحيل
 واحد بخطاها تمشي له
 واحد تحي له زحافه
 واحد عنده مستحيله
 كم غرغور مثل الفرسة
 مافيه ولا حسيله
 مركوز عند الركبة
 بين البركة والثيلة
 مايدري وشلون الدنيا
 هي غبرا والا جميله
 الدنيا فيها كيفات
 الله اكبر يامن هي له
 يالله ياللي نرجي منه
 ياابا العطايا الجزيله

ياما عند الله من خير
عنده خيرات فضيله
الله ياعود لاقواني
شد جراني وش عندي له
يوم ان العود امتاوزني
مدري من هاللي يفتي له
والله ما عندي له عيش
ولا عندي له رميله
والكسوه مقطع دسمال
هلب الخياط بتشليله
وبشيت من نوب عويدي
بجلال المشط يسدي له
قالوا هذا الفقير الكايد
بالك تجزع من تتيله
تعوذ منه وقل يالله
ياربي لاتجعدعني له
واطلب ربك في صلاتك
في الفريضه والنفيله
بالك تقول مطاولني
تري الله يقدر يزيله


الياس يدخلك النار
 ترى الياس اكبر تضليله
 من سوا خير في الناس
 كل بالجنة يدعي له
 ومن سوا شر في الدنيا
 قالوا يانار اتسمعي له
 ولا للناس الا الصالح
 والفاسد له من يتكي له
 لاتاخذ علم من جاهل
 تجهل مثله في تجهيله
 دور لك رجال صاحي
 ماتلقى مثله في جيله
 أيا ورد الشط الجاري
 وأيا اللي يارد ثميله
 وراد الشط اللي ورده
 حدر بانهار تجري له
 والتميله من جا اليها
 والله مايملا صميله
 من هالدنيا وا عزالي
 واللي مثلي وا عزلي له

انا وايا الفقراء اصحاب
هو ينزي لي وانا انزي له
والى منا تنازينا
عند الديان افـخـي له
اشكي والشكوى الى الله
نعم المولى يوم اشكي له
صلاة الله واسلم
على النبي اشرف جيله

هذي قصيدة العجيمي يشكي فيها الفقر وهذا حال الدنيا، الله سبحانه
وتعالى وزع الارزاق على العباد احد يخلق فقير وربما ان الفقر ازين له بعض
المرات واحد يصير غني وتلقاه بعض المرات مستضر من غناته .

في وقتنا الحاضر بعض التجار والاغنياء مايمشي الا وشنطة الادوية معه هذا
عن الضغط وهذا عن السكر وانه يتمنى الى مر ان حاله مثل هالعامل اللي يوم
يشغل ويومين يقعد مايلقى شغل .

ومحمد العجيمي رحمة الله عليه اخر ايامه وتالي وقته شفته انا، رحت في
زيارة للوشم ومريت عليه في ديرته واخذته بالسيارة وقعدنا نتمشى شوي
وجلسنا خارج المدينة وتقهوينا . قلت : وشلونك يا ابو عبدالعزیز عساك طيب
وش علومك ؟ قال : والله ياولدي تركت القصيد، القصيد ماحصلت منه خير
وانا يوم كبرت انصرفت للقران، فكانت ذاكرته جيدة في الحفظ فحفظ القران
وصار يقرأ على الناس وصارت خاتمته خاتمة خير . الى أن توفي رحمه الله .



الأم وزوجة ابنها

القصة والقصيدة جرت على الشاعر ابراهيم ابن عبدالله ابن جعيثن رحمه الله، ولد في مدينة التويم بأقليم سدير عام ١٢٦٠ هـ وتوفي في نفس المدينة عام ١٣٦٣ هـ، كان بالاضافه الى انه شاعر راوية لغيره وله ديوان مطبوع ويعتبر شاعر سدير الأول لأنه طرق كل ابواب الشعر المديح والغزل والحكمه والوصف وطلب الخير والسيل وقد قال قصيدة في جماعته يطلب لهم الغيث اللي مطلعها يقول:

يالله بنو للرعـد به زلازـيل
 ينشي من القبلة صدوق خياله
 ينشي الضحى وهو اسود كنه الليل
 البرق به مثل الضوي اشتعاله
 يحدأ ركونه مثل زجر المحاحيل
 وعياز مزنه مثل دامر حلاله
 والى انتهض ساق السدى بالهماليل
 مثل النعام اللي تزايد جفاله
 من واحد ماهوب منان وبخيل
 رب كريم وكل حي يساله
 سيل يعم سدير من غير تفصيل
 عقب اربعين الحول يذكر كماله

هذي قصيدة طويلة وله قصايد في عدة مناسبات ، وبالإضافة الى انه شاعر كان يروي لغيره ، فيسولف علي الراوي الكبير رحمة الله عليه محمد ابن عبدالرحمن ابن يحيى اللي ألف كتاب (لباب الافكار من غرائب الاشعار) ثمانية مجلدات مخطوطة لم يطبع منها شي ، ماتين منها على الساحة الا اثنين فقط فكان يعتبر من الرواة المعدودين وابراهيم ابن جعيش هذا عاصر محمد بن عشبان من ابرز شعراء مدينة جلاجل ، لحق عليه ابن جعيش وهو كبير في السن وابن عشبان معاصراً لحמידان الشويعر ، زايه ثلاث مرات في حياته ، زاره مرتين في القصب ومرة في اثثيه ، ابن عشبان اخذ قصيد حميدان ونقله لابن جعيش وابن جعيش نقله لابن يحيى وجمعوا كتاب حميدان الشويعر ،

هذي نبذه بسيطه عن ابن جعيش رحمة الله عليه ، شاعر معروف وله قصيد غزل جميل وله قصيدة منها يقول فيها :

لقت حي يجلي الهم بالزين
وانساح بالي يوم شميت ريحه
وهجيت باب الوصل بين المحبين
من طاح لابهده سهل مطيحه
ياونة ونيتها يوم الاثنين
ونة صوب معطب به جريحه
أو ونة اللي له بني مزابين
شايب و ورته دروب الفضيحه

وله قصيده يقول فيها :

البارحة ليلي عسى الله يعوده يازين وصل الليل من بين الاحباب

والآن هذي قصيده عاطفيه له ومناسبتها :

ان فيه واحد من اهل ديرته راح للخليج يدور العيشة ويوم يطلع من ديرته التويم ماكان في البيت الا أمه عجوز وابوه متوفي ، هالام بنت حلال اجوديه وراعية طاعه مالها حس من حباتها وطبيتها الله يرحمها ، وله زوجة في البيت وله اخو صغير ويمكن له وليد أو بنيّه لكن هذولي الاسرة الرئيسية في البيت .

هالولد اللي راح يشتغل في الخليج ويدور العيشه كل ماتم له فترة ومضى عليه مدة جمع له قريشات وروح لأهله صوغة ، ، والصوغة عبارة عن لفافه مثلا منديل كبير يلف فيه شي او كيسه يروح فيها لاهله صوغة (لأمه وحرمة واخوه الصغير وعياله الموجودين) وهالرجال اذا كان موجود عندهم تظاهرت زوجته عنده انها تحب أمه وتغليها واذا صار مهوب فيه توريتها سوء العذاب وماتعطيها تقدير وقيمه ، الحاصل ان هالولد صحيح مسكين اذا جا يرسل الصوغة يكتب عليها الى زوجتي العزيزة فلانه بنت فلان وتجيهم الصوغة ويوم جت هاك المرة والاه مروح الصوغة مع رجال ، وها الرجال طق عليهم الباب وقال : سلام عليكم هذا بيت فلان قالت نعم قال هذي صوغة مروحها لكم ابوكم ، وعطاهم اياها ، وقومي بالمرّة وتفل الصوغة قدام أمه وهالام كن عيني تشوفها بنت حلال يدياتها ووجهها بيض من الطاعة ويديها فيها حنا ناعم ومعها مسواك ، ويوم فكت الزوجة الصوغة^(١) وطلعت الى فيها والاه مروح لأمه كيسه حنا وغرشة طيب

(١) أحد يسميها صوغة واحد يسميها بقشه واحد يسميها طرد..

وجلال صلاة وكسوة للأم تتناسب مع عمرها ومعهن رسالة منه لأمه باسمها
جدعته عليها مرته قالت خذي هذا خط من ولدك وقامت الأم وخطفته وحطته
على وجهها وشمته وعلى قلبها وعيونها تدمع وتقول يا هلا بريحة ضناني وخلت
واحد من عيال الجيران يقرأها عليها وكلما قرا سطر بكت الأم ما غير يتهشم
صدرها بالبكاء وعيونها تهلهل .

وحاط هو في الجهة الثانية من الصوغة لمرته خماخم وزمام ومعاضد
وقارورة طيب وكيسة لبان ، من يوم فكت الصوغة اول مافاض عليها اللبان
تاخذنه وتعلك قدام امه تبي تحرها ، وبالاضافه الى هذا كله مروّح لهم فلوس في
صرار مصروف لهم وقامت المرة تقيّس اللي ارسله لها رجلها وتفلل وتقول أي
بالله يعرف مقاسي تبي تحرّ أمه ، بيض الله وجهه وقالت الام : استحي على
وجهك انا الكبيرة وانا الأم عطيني الدراهم انا اللي اصرف على البيت وعطيني
الصوغة انا اللي اقسّم . . قالت : لا يا حبيبي انتي حرمتي ؟ شوفي وش هو كاتب
على الصوغة الى زوجتي العزيزة ، انتي زوجته ؟ اقعدي هناك لين اعطيك انا ،
وبعد ايام راحت الأم لابن جعيثن لأنه كان من جماعتهم وساكن في سوقهم
وقالت لمرت ابن جعيثن ابيه الله يجزاه خير يكتب على لساني قصيده رد على
فعل ولدي اللي مسوي كذا كود انه ينتبه ويصير رجال ويعقل ولا يخلي مرته
تشخ عليّ أنا بأمه الى صار ما هوب عندنا وقام وكتب القصيدة وارسلتها له وهي
تقول فيها ان خطه اللي جا منه اعتبر مثل قميص يوسف تعد وتمد متى يجي
ويعود ولدها وتطلب له ان الله يرجعه .

ويقول الشاعر على لسان الام في القصيدة:

لفاني كتابك ياسراج نظير

والدمع من عيني عليه ثير

لفاني وحطيته على القلب فرحه

وبشرت من لي صاحب وعشير

كنه قميص ليوسف يوم جابه

لأبوه من بعد الفراق بشير

من يوم وصل بها البشير وشمه

فتح وهو من قبل كان ضير

خيار مابه كلمة سرنى بها

يقول حق الوالدين كير

عساك تذكر حقهم يا وليدي

ويا جعل خيرك مايزال كثير

حملتك تسعة اشهر في شنواكلي

والبطن منى ماقع وجفير

حملت بك كره وكره وضعتك

وسعت لك حضني وصار سرير

ورضاعتك حولين من در مهجتي

ارعاك بعيوني عن الخطير

ابيك لعازات الليالي ذخيره
 مايبك تشفع لي بيوم كيـــــ
 حتى بلغت الرشد وابصرت نفسك
 وقدري غدا عند الرجال حقير
 قلطت بنت الناس وانا نسيتني
 وحطيت فوقى بالولاة امير
 خف الله ماقبلك حدن بعد امه
 وقلط بنت الناس كيف يصير
 خف الله في امك لاتجيك العقوبة
 ولا تامن الدنيا مداه قصير
 خف الله واذكر آيتين نسيتهن
 وهن تراهن للبصير نذير
 ما قال الله لاتقل لهما اف
 واجعل لهم منك الولا يسيـــــ
 واخفض جناح الذل لهم برحمه
 وقل ربي ارحمهم ربيت صغير
 خف الله واذكر حفرة مدلهمة
 يحاسبك فيها منكر ونكير
 تراك لو غثيتني واغضببتني
 دعيت بلساني عليك كثير

مهوب بغض لك فلا شك شرهه
 عليك والوالد عناه كبير
 تراك لو حجيت بي فوق راسك
 ثمانين حجه ما بلغت عشير
 ولا تجازيني عن الطلق ساعه
 الى قام قلبي من حشاي يطير
 وصدري يفرض بالسكاكين كنه
 يهذب بسيف البائع الشطير
 ولا عاد في بطني ولا عاد في ظهري
 ولا ظنتي ارجي يعود صغير
 الا انت واخو لك بوزير صغير
 مافيه لأمر الرجال بصير
 مير انني ارجيه يحضى بكبرتي
 واذوق نفعه قبل ازور حفير
 وارجى الذي وداك يرجعك سالم
 علي فان الله عليه قدير
 ويرزقك رزق واسع ما حسبته
 وترد يا بني والعدو حفير
 وصلوا على سيد البرايا محمد
 ملاح برق وما حفر من بير

والحقيقه شان الام كبير ويجب على الرجال انه يداري حق امه ويتفقد وضع
زوجته مع امه من بعيد من غير مايدرون ويشوف معاملتها معها ، والناس ولله
الحمد لايزالون بخير وعيال فطره وناس اجواد لكن احيانا يوافق حريم مايخافن
من الله .

وهذي من القصايد اللي تعتبر مثل الدرس للزوجه والولد .



من قاب قاب الله عليه

السالفة التالية عن الشاعر محمد ابن عبدالعزيز العجيمي رحمة الله عليه ،
من شعراء القصب البارزين ، شاعر رد ونظم ولكن توفى وماطبع له شي من
الدواوين ولا جمع قصيده لأنه في اخر حياته انصرف الى حفظ القرآن الكريم ،
والقصيدة اللي معنا الان فيها شي من الموعظه للناس والحكمه والموعظه دائماً
يسمونها ضالة المؤمن يدورها لين يلقاها .

الرجل هذا حسب ماسمعت كان في بدايته يوم انه نشيط يشتغل في النخيل
ومن اللي يحفرون القلبان ويقال والله اعلم انهم وهم يحفرون قلب هو
ومجموعة معه ثار عليهم ديناميت اثر على عيونه وماعالج ولا شي لين كف
بصره وصار ماعاد يشوف وتأخر في امور كثيرة ماتحصل عليها والفقر مثل مايقول
الاولين الفقر يحدث في الرجال عيوب ، فقال قصيدة عجيبه فيها يوجد ويتمنى
ان الله سبحانه وتعالى يرد له بصره وتمنى انه يشوف طويق وتمنى يشوف الفريده
(مواقع حول الوشم) وفوق هذا كله يتمنى يحصل له لو يحج وياطا برجله على
المروه والصفاء يطوف حول الكعبه ويحب البيت ويرجع لأنه كف بصره وكبر
وشيب وهو مادي فريضة الحج فيقول في هالقصيده حسب ماسمعتها منه :

سلامي عد ماناح الحمام

سلام الباهشين الفارحيني

ترحل يا نديبي فوق حرة

عليها الكور ريف المعتليني

عليها الدل يحا طبق اثرها
 حلى ما يشغلون العامليني
 تنحدر واحد للعلم راسي
 كما عد رسا للوارديني
 وانا في ضامري هرج مكني
 واماري به جميع القايليني
 تهلهل من صناديق الضماير
 كما دبوا دنت للذايديني
 بنينا بالشعر قصر تعلت
 فروعه بالسما من غير طيني
 حديد والحديد اقشر قساوة
 حديد من حديد ما يليني
 يرتب فيه تسعين الف نادر
 من ابطال القروم الفارسيني
 على خضر تحدر من سماها
 على شوب العدا متخالفيني
 انا نقلت هم لو تشييله
 ضلوع طويق طارت كالطحيني
 الا يا ونتي ونت محسر
 كسير الساق بين الكاينيني

لاهوب اللي غدا والموت راحة
 ولا سلف مع اللي سالفيني
 والا يا ونتي ونة ربيط
 ربيط في حديد الحاكميني
 تحرى كل يوم يظهرونه
 يقصونه بهندي سنيني
 والا يا ونتي ونة معوثر
 على فرش القصا جر الونيني
 لاهوب اللي طوى ياس العوافي
 ولا عوفي مع اللي طيبيني
 ولا يا حزن قلبي حزن عذرا
 لها ستة عيال ملتحنيني
 وابوهم سابع قفى وراهم
 جميع فالقبور مقبريني
 والا يا تل قلبي تل ملحاحا
 عليها الغرب وقت مشربيني
 وراها كالف قلت همومه
 تقفاها واهلها مهتويني
 على وقت الحميم قران خامس
 عقيبتها تناظرها رسيني

غدينا مثل سارين بغدرا
 عن اللي فيه خير تا بهيني
 قرينا فالهوى عشرين عام
 والا ياليت الا به ما قريني
 وطاني فيه ذنب ويش لونه
 نحسرنا منه ثم عميني
 والا يا حمس قلبي حمس بن
 متى ما حرقوه الحامسيني
 والا يا هشم قلبي مثل هشمه
 على حيد بحيد مرتكيني
 والا يا الله يا محجي ومبري
 تعدينا صياح الغافليني
 انا من قبل هاللي حل مادري
 ولكن شفت هول الهايليني
 وانا بانصحك باللي ما قرينا
 ترا الشيطان سيد الكافريني
 الى قراك قريات خبيثة
 تعوذ في مقام العايليني
 ترا من عمل سو ما له الا
 لهيب النار وانتم خابريني

ترا من عمل خير شاف خيره
ترا التقوى رياض الصالحيني
بها انهار تداعج مستمة
على جيلانها خوخ وتيني
وفيهما من جميعات المعاني
موسعها الولي للعابديني
والا يا وجد وجدي لو وجدي
يبي يصمل ولو ربع الشميني
كفاني عن جميع الوجد كله
توسدته بامان الخايفيني
انا لکن في ثومة فوادي
مهاشير تهجرع بالحنيني
حسايف راحت الدنيا عليه
طفیخ القلب مانيب الذهيني
الى منه نصحني صاحب لي
زعلت وقلت هذا مبتليني
الى منه نصحني صاقت لي
وعيت وتوما عاض الكيني
والا يا الله يا عالم بحالي
انا ما مثل حالي هالحنيني

تحملت العنا وازريت اشيله
 وانا وايا العنا متمالحيني
 طوال الليل ما نامت عيوني
 حسير والخلايق ممرحيني
 انا ما نيب حي في طرابة
 ولا ميت مع اللي ميتيني
 انا من قبل هذا لي رفاقة
 رفيق كبر راسه ما ييني
 تكبر والكبر لله جلاله
 ورا ما قال ما جا ذا يجيني
 انا اللي فاتني هو قطع قلبي
 كما فوت السحور النايمني
 الى كل قرا واستر دينه
 عسى الله ما يعاقبني بديني
 الا ياليت من يفتح بعينه
 على طرق الهدى مدة سيني
 والا ياليت من شاف الضواحي
 طعاميس زمت دون البطيني
 والا ياليت من شاف الفريدة
 وضلع طويق وبكار تبيني

والا ياليت من ياطا برجله
صفا داجو عليه التاييني
واسلم والسلام من البوادي
واشاهد والحجيج مشاهديني
والقط سبع تسبيع عدادي
واحذفهن على رجم اللعيني
واحب البيت وانطح به فوادي
واجي من عندها متوادعيني
واكرب فوق مامون معرب
خفيف الخف مربوع سميني
انا دنياي غرتني مغرة
تعالى يا مليحة طالبيني
انا باحتج قبلك يا خيونة
ترا الله ما يعز الخاينيني
ضحكتي لي وضحكك بالثنايا
قضيتي لي فلا شك اذبحيني
الا يا ويش وجهي عند ربي
والا يا خد موجي وابلعيني

والحمد لله الله سبحانه وتعالى ان بلغه الحج لأن الحج متيسر في وقته الاخير وهو مامات الا قريب، الله العالم انه حدود ١٤١٠ او ١٤١٢ هـ، نعمة البصر مالها ثمن ودائما الواحد يدعي في صلاته وفي قيامه وجلسه .

(اللهم متعني في سمعي وبصري وقوتي ابدا ماحييتني) فها لرجل يوم فقد بصره تحسّر وتأذى وتأسف على اللي فات عليه في شبابه واللي يتوب الله عليه يقول ان قضيت حياتي في الشعر والقصيد ولا انتهت وكل من جاني ينصخني ماطعته وكل هذا مبينه في القصيده، نقول ان الله يتوب عليه والحمد لله خاتمه خاتمة خير وكانت ذاكرته في الحفظ جيده في القصيده ويلقيها بطريقة مثل السجع .

وبشيله تسمى عند الاولين ديونه، كل اكثر القصيد المهمل اللي مثلا مهوب على قافيه مرتبه في الصدر والعجز يشال في المجالس بشيلات تسمى الديونه، وهذي طريقة العجيمي في اكثر قصايد رحمة الله عليه وهذي من القصايد اللي مادونت وانا سمعتها منه بصوته الله يغفر له ويرحمه وحببت انقلها لكم لعلها تنال على اعجابكم ورضاكم ويكون انشالله فيها فائده وعبره ان الانسان دائما يحمد الله على النعم اللي هو معطيه في الابصار والسمع وفي القوه وينظر للناس الثانين اللي فيهم عاهات، المريض يتمنى انه يطيب وما يصير عاله على اهله، فنشكر الله على نعمه ونحمده عليها .



الشاعر الغزلي محمد الفيحاني

في هالسالفة ابتكلم عن شاعر من الشعراء البارزين اللي انجبتهم دولة قطر وهو الشاعر محمد بن جاسم بن عبد الوهاب الفيحاني، علم معروف من ابرز الشعراء، له ديوان مطبوع، ماجمّع فيه الا بعض من قصائده، بعضها ضاع وبعضها في صدور ناس ماتوا وبعضها في اوراق متفرقة وهذا حسب المعلومات اللي قريتها واطلعت عليها. محمد الفيحاني رحمة الله عليه ولد في بلدة الفويرط شمال قطر عام ١٣٢٥هـ حسب ترجيحات اللي عاصروه، عاش فيها مرحلة صباه وشبابه وتولى تربيته والده جاسم رحمة الله عليه، ووالده بعث محمد الى مدرسة المباركية في الكويت وتعلم فيها القراءه والكتابه ولكن ماکمل دراسته لأن اسباب المعيشه في هاك الوقت صعبة وقاسية فاتجه للغوص واخذ خبرة في الغوص لين اصبح غواص ماهر من الغواصين المهرة اللي يشار لهم بالبنان، لأن مهنة الغوص مهيب بهاك السهولة والبساطة، تبي رجال صبور وفيه قوة وشجاعة واقدام فكانت كل هالصفات متوفرة فيه.

لكن مع تقدم السنين والحياة ترك الغوص وكان يوم يتوفى صغير عمره حول ال ٥٠ سنه، وهو كان يقول الشعر من يوم انه صغير بس انه مهوب يعلم به الا المقربين من اصدقائه اللي حوله، بعد هذا رجع لبلدته وتولع في حب فتاة من نفس بلدته وحمولته وطبعاً هو يرجع نسبه من الفياحين من قبيلة سبيع، ولكن يبدو ان شروط التحجير هاك الحين حالت بينه وبين البنت اللي عشقها والحب في هاك السنين كان حب عذري وعفيف وصادق ونقي، هذي من شيمات العرب

انه ما يهوجس في ضميره انه يأتي بشي من الحرام، فهو نزيه عنها ولله الحمد، فما حصل له الزواج منها، وقد طرق ابواب الشعر كلها (المدح، والغزل والحب العذري والرتاء والهجاء والوصف والحكمه) .

وكان غالبية قصيده يغلب عليه الشكوى والانين والحنين لأنه ماتوفق في اللي يتوسط بهم عند أهل البنت اللي عشقها، يبين في القصيدة اللي بقولها ان كل اللي وسطهم في الموضوع يعطونه كلام طيب لكن بعضه مهوب على حقيقته، ربما انه يواجههم صعوبات من ناحية الجهة المقابلة اللي هم اهل البنت . .

ومن شدة ولعه وهيامه في هالبنت قام يقول قصيد الى ان اثر عليه القصيد واثر على حياته، صار كل قصيدة فيها شي من الانين والحزن . .

طبعاً هو مثل ما ذكرت يوم يتوفى رحمة الله عليه ما جمع اغلب قصيده، واحد من اصدقائه المقرين هو اللي جمع ما استطاع عليه من قصيده لكن كل ماتموا الناس فترة طلع له قصيدة واشتهر هو بأنه صاحب الحب العذري واللي مآثر عليه قصيد الحب، اثر عليه وعلى صحته عقب ماتعدى عمره فوق الاربعين ومرض وراح يعالج في دوله ثانيه برا. وتوفى رحمه الله، ويقال انه من ضحايا الغرام يعني صابه مثل ما صاب الدجيما ومسلم الوليعي او مجنون ليلي في الزمان السابق وتوفى في مستشفى خارج دولة قطر عام ١٣٥٣ هـ يعني يصير عمره تقريبا ٤٨ سنه .

قصيدته اللي هو قالها ما كانت موجودة في الديوان انما وجدها الاستاذ حمد بن محسن النعيمي ونشرها في احد صفحات الادب الشعبي اللي كان يشرف عليها .

والقصيدة يقول فيها الفيحاني وهي من النوع اللي يسمى الصخري :

فجاني من زماني مافجاني
وقلبني على نار وكـواني
ولح الحال وابرى العظم كله
وقوسني كما الطار وحناني
وشرق بي وغرب بي معود
بتعذيب عقب مراح ثاني
ولم جيوش غاراته و دون
وصار بغير ضرب الهندواني
اقوله واحسب ان الدهر فاعل
وكل الفعل هذا من اخواني
ولولاهم بصحبتهم خذوني
لكان الهم ماشفته بلاني
يغروني بوجهي بالحكايا
ومن تحت الحكي غش دفاني
يواروني المودة لا لقـواني
ومافي القلب ماهو في اللساني
وكم من واحد اديت حقه
ومن حقي فلا ربه عطاني

وكم من واحد واليت وده
 ومن ودي وليفي ماولاني
 وكم من واحد جيته بطيب
 وهو بالخبث والمكروه جاني
 وكم من واحد انذر لقربه
 وهو ينذر لبعدي واقلعاني
 مثل منهو يصك الباب دوني
 ويقمعني عقب ماجيت عاني
 يظن اني غدير فيه جاهل
 يقول الباب ذا صكه فلاني
 يحسب انه بهذا القول يعذر
 وانا ادري بين شكله عياني
 وتالي قام بيديه وحذفني
 بنشاب من الصد ورماني
 وعود كالجمل ياكل بدوده
 وكما العقفا تعود بعقفاني
 الا باليت عن ودي تنزح
 قطع قلصه وخلاني مكاني
 وياليت ماذكرني في علومه
 وكف الشر بالخير وكفاني

هفا درب المراحل والمرّو
 ولا عيّنت للشيمه مكاني
 بليت الناس بالتجريب حتى
 تبين كل مامنهم خفاني
 ولا عيّنت في قومي وربعي
 من اللي عانني والا شفاني
 ولا خذت العهد من واحد الا
 تمنيت البدل منه بشاني
 هفا حظي وقصّر لا يحصل
 صليح له على طول الزماني
 يعاهدني على خيري وشري
 وياخذ من ورا عهدي اماني
 لك الله ماتغير عنه لا من
 تلاقى بالحقب مس البطاني

وهذي قصيدته اللي هو قالها عن حبه والاشخاص اللي كان واثق انهم
 يبساعدونه ويتوسطون له في الموضوع لعله ينحل لكن هذا حظه وهذا اللي الله
 كتب له ويبدو ان السبب مثل ما ذكرت في السابق تقاليد التحجير، منول البنّت
 اذا حجروا عليها عيال العم ماحد يقدر ياخذها غيرهم، ولهذا محمد الفيحاني
 اعتبروه اهل جيله من ضحايا الغرام وكثير اللي مثله يعتبرون ضحايا الغرام لكن
 مهوب شعراء ومن ضحايا الغرام المعروفين ووردت اساميهم في الشعر: مجنون
 ليلي، و محمد ابن راشد ابن عمار راعي الالفية اللي يقول:

الف اولف من كلام نظيفي

ودموع عيني فوق خدي ذريفي

هذا من اهل ثادق وقعد فتره فيها يرقى الجبال، يقولون اخر مرة شافوه كان

في حايل، ومنهم دخيل الله الدجيم صاحب القصيدة المشهورة اللي يقول فيها:

يا جر قلب جر لدن الغصوني

غصون سدر جرها السيل جرا

على الذي مشيه تخطي بهوني

العصر من بين الفريقين مرا

ياليتهم في الحب ماولعوني

كان ابعادوا عني بخير وشر

والا انهم يوم انهم ولعوني

خلوني آخذ حاجتي واتدرا

وكذلك منهم الشاعر / مسلم الوليعي الذي مات بسبب الغرام والعشق والله

اعلم اللي يقول:

يقول الوليعي والوليعي مَسْلَمٌ

من دامت أيام الصباء له دام

وسوف نورد قصته أيضاً في هذا الكتاب وبالله التوفيق .



الزواج من أجنبية

هذه القصيدة للشاعر/ مرشد بن سعد البذال الرشيدى الله يرحمه ، وهو من شعراء الكويت المعروفين ومن أبرز الشعراء وله خمسة دوواين مطبوعة ، مرشد قال قصيدة عالج فيها وضع اجتماعي يتكرر الصراحة في كل بلد ، يعني موجود في كل دول الخليج ، موجود في السعودية وفي كل مكان ، وخاصة في دول الخليج ، وهو بعض كبار السن هالشيبان الكبار الى من رزقه الله وصار عنده دراهم واجدة ، يعني هو ما يهوجس بعمل الخير ، مايقول اني انا كبير سن والله رزقني ابي اساعد في بناء مدرسة في قريتي اللي انا منها والا ابني مسجد . أول ما يهوجس فيه العرس ، وين يعرس ، وين يروح .

بعض ذا الشيبان يحسن ان في نفسه شوي نشاط ، ولا يشاور ولا يعلم ودلى يختخت من مكان لمكان ما يدري عنه أحد وأحياناً يروح ياطا السريح عناد ، يروح مثلاً يتزوج من ديرة برا ، لا شاور حكومته . . ولا أخذ أذن ، ويورط نفسه ويورط عايلته مثلاً بعيال ويورط حتى دولته الي هو منها ، ولو دورا في ديرته زوجة يمكن يلقا لكن يروح ويغره البياض ويغره التدلع ويتزوج من برا مشكلة ، المهم انه يروح ويأخذ له حرمة ولا يعلم أحد ، ويعجب منها ولد وبنت ، ثم أنشب عياله وأنشب اسرته بهالعيال وانشب حتى حكومته . . ، أبروح اجيب المرة . . . جبت المرة ، وإلى جاب المرة مايكفي جيبتها لحالها ، بعد بيعجب من أقاربها ، ويبيلها بيت ويبيلها شقة ، ونشب في قصة طويلة عريضة ماتنتهي ، وحتى يمكن هو مافيه شدة ولا نشاط ، والى تم له سنة سنتين والاه ما عاد يقدر يقوم ألا على

لحيته من ضعف العزم، وبعضهم يأذي عياله، أنا أخبر واحد أذى عياله، مرة
يوسوس، ومرة يجيبون له مطوع يقرأ عليه، عاد هو عيار جاب له ولده مطوع
يقرأ عليه، وحطه عند ذا الي ينث عليه على صدره، عليه ذاك الثوب، ويقرأ
عليه ذاك المطوع، وتقل أنه مهوب مقتنع، عاد يقول لولده: يا عبدالله وش ذا،
قال له الولد: جايه يقرأ عليك عن ضيقة ذا الصدر والوساويس، قال: يعني
جايه ذا يتقل علي، وش أنا مسوي قال: هذا يقرأ عليك من كلام الله.. كود
انك تطمئن.. كل يوم هواجيس وتهوش علينا.

الحاصل ان بعض هالشبيان الي عنده حلال وراح لديره ثانية، وإذا راح ووصل
هاك الدير، فيها ناس جو عانين يزينون له الشين لين يصير زين، يفرشون له الأرض
ورد، ويا هلا وسهلا، لأنهم هلكين مساكين وجاب الله لهم هالشبيان، وأحياناً
تصير الوسطة لموضوع عرسه عجوز، من عفاريت، ابليس يجيها كل يوم ياخذ منها
درس ويعود، وتزين له الأرض، ناس طيبين وناس أجاويد، ويقولون المحل
محلّك، ومثلك يعلمون البنت، شوفي: اضحكي له وترقري له ترا مهوب راعي
طويلة معك، وامزحي معه، ولو يقول لك مثلاً دلة موتي من الضحك حتى لو هي
ما تضحك، لو يقول لك مدخنة اضحكي، خليه يستانس وينبسط، البن تقضي
قريشاته، وتراه مهوب راعي طويلة، عاد الحقيقة مرشد البذالي الله يرحمه مثل على
هالكلام هذا وجابه بقصيدة وهو شايف هالشوفة بعينه مدري عاد شايفها هو بديرتهم
أو شايفها برا، لكنه مية بالمية شايفها برا لأنه من خلال القصيدة بين، يقول:

لقيت عود ماخذ له جميلة

مزبونة من نايفات العذارى

خد كما الكهرب وعنق وجديلة
ونهود دارتهن ثمرهن صغارا
لا صار عود مثل لون الجفيلة
وإلى مشى قامت عظامه تبارا
يلقى من الي فتهن يستوي له
ماله بمشكلة البنات الصغارا
إلى حطها في وسط بيته حليته
تراه لاكبر مشكلة بانتظارا
لو ان بعض الناس يدرك دليله
ان كان عن بعض الأمور استخارا
شي ما هو لك لا تعرض سبيله
مالك بصعبات الأمور العسارا
بعض العوادة صار فيهم وسيلة
ليأعطاه الله تشوش وطارا
كل ملا كيسه وروح يشيله
والقى بدار كل أهلها فقارى
والفقر باع البنت في قوت ليلة
الضعف هدام البيوت الكبارا
والعود بالشارع تزايد هذيله
يبي العمار ومرجعه للدمارا

روح ينشد وين منزل عميله
 والا يتلفت له يجي بالمطارا
 صله على ناس ضعوف هزيله
 بيون قوت للعيال الصغارا
 مع فقرهم فيهم شطارة وحيلة
 وبناتهم متعلمات شطارا
 والكل منهم يمدحه ويحبي له
 يبي يحوزه يم مرمى القرارا
 هو يحسبه غازي وهو ينغزي له
 هو طمعة الخيال يوم المثارا
 جابوا له الزوجة وهو شد حيله
 شاف البياض بخدها والحمارا
 قامت ترقرق له بعين كحيلة
 لعبت بعقل العود لعب القمارا
 معها مدربة الذليل الأصيلة
 شيب من الحيلات فيها توارى
 قالت لها اخذي خاطره واضحكي له
 دوري معه يا بنت من حيث دارا
 تراه ماهو فينك راعي طويلة
 الموت في وجهه كتب له شعارا

وارجي لعل العود يومه يزيله
واخذي ثمينك واسحبي للسفارة
ماهوب من جيلك ولا انتي لجيله
مير اكسبي من مقفيات العمارا
عود ومره الله ينفد حصيله
لو عد روحه من كبار التجارا

هذي القصيدة الي قالها الشاعر مرشد البذال في مثل هالموضوع، لكن نقول الي
صحيح مثلاً محتاج وفي حاجة وأم عياله متوفية، ويبي وحدة ترعى شؤونه، ولا
هوب يفكر بعيال، ولا لقي في ديرته، ممكن يروح، شاعر يقاله ابن عويس يقول:

والله فلا آخذ غير بنت بلادي
الي عليها بالعفاف وسام
لو كان سودا تلبس الطاقية
ما للشعر في جمجمتها رسام

يقول بنت بلدي عندي أحسن من أني أخذ وحدة ما أدري وش أصلها وش
فصلها، وبكرة ينشب بأطفال وعيال، لكن مثلاً شخص كبير وشخص مثلاً أم
عياله متوفية أو مريضه وهو ما زال فيه نشاط لاباس، لكن مثل هالأمور هذي ما
ودك يتجرأ الواحد فيها ويكابر ويعيي على عياله ويقول: أنا اللي على حق وأنا
اللي على صواب، واجد ترا اللي من هالنمونة، وعيالهم بكرا وبناتهم يضيعون
في الخارج، الى منها جت وقعدت لها مثلاً سنة سنتين ولا جازت لها الديرة،
ورجعت وأن كان عندها بنات صغار تاخذهم، مير الولد بكيفه يدبر عمره، لكن

البنّت هي الي عليها الخطر وهي الي عليها العار وعليها الشرف ، الحقيقة يعني
هذي القصيدة فيها شي من التوجيه وفيها شي من العلاج للقضايا الاجتماعية الي
مثل هذي ، ويجب الحقيقة على كل واحد يشوف من النوع هذا ، أنه ينصح وأنه
يتوسط واسطة خير ، أو حتى بعض الأخوان الي ماله لزوم مثلاً الي يروح مسير
له على ديرة ، ما تدري ألا كل يوم مسافر ، كل يوم جوازه معه ، والى جا الله يستر
في هالفنادق الي برا ، ذكرت من القصيدة الي من شوي حقت سليمان العويس
الي يذكر فيها : والله فلاأخذ غير بنت بلادي ، يقول ان بعضهم هناك الي جا في
الفنادق ، وسط الفنادق الله يكافينا الشر ، يختبر ويجرب ، الي اختبرها وطلعت
زينة يجيبها زوجة خلال أيام ، بس وش يدريك يمكن تحيك وهي بشهرها الرابع ،

وسط الفنادق يختبر ويجرب

بالعهر اللي وافيات اجسام

الي اختبرها ثم صارت زينة

يجيبها زوجة خلال ايام

يمكن تحيك وهي بشهرها الرابع

برميل أمانة به ملاها قمام

من الجرايم عد فيها وأغلط

الجيب مليان صور وأرقام

هذا صديق من زمان غايب

تبي تجدد له غلاها العام

الا وبعء في كل حول زيارة
ستين الألف يروحن شمام
هذا لابوي وهذا لزوم لأمي
دخل الضعيف راح وصل الأرحام
والله فلا آخذ غير بنت بلادي
اللي عليها بالعفاف وسام
لو كان سودا تلسب الطاقية
ما للشعر في جمجمتها رسام

ولا نقول أنه مثلا كل الدول العربية الحمد لله بعض من الدول فيها عوايل
طيبة وفيها عوايل أصيلة .

لكن العوايل الطيبة والأصيلة أن كانك صادق رح لهم ، يبون بناتهم لعيالهم
لأقاربهم ، ما يفرطون بيناتهم ولا يفرطون بهم ويروحونهم برا . خارج
بلدهم . هذا وبالله التوفيق .





قصة بداح العنقري

بداح العنقري من أهل ثرمداء ومعروف من أسرة العناقر من بني سعد من تميم ومعروف عنه الشجاعة والكرم والظفر والاقدام وشاعر غزل رقيق ولما كانت أقامته في بلده ثرمداء كان يقطن عنده البعض من امراء البادية في وقت الصيف وفي مرة من المرات اعجب باشتياق إلى بنت من بنات احد امراء البادية القاطنين عنده ولكن لم يبين لبوها ذلك مراعاة في ان والدها شريب له اي أنه جلس عنده وتبادل معه العشرة والمجالسة والعيش والملح بينهم ولم يرغب في ان يبين له أنه يريد ابنته الجميلة حياً منه .

ولكن لما احوالوا الي الربيع بعدما لاحت بروق الوسم وشدوا من حوله لحق بهم واستضافهم وصار ضيف عندهم وكانت عادات العرب فالزمن القديم ما يسألون الضيف عن شي حتى يمضي في الضيافة ثلاثة أيام بعدها يسألونه وينشدونه عن سبب مجيئه وش يبي اذاله حاجه وبعد مضي ثلاثة أيام سأله المعزب وقال ما جيت يا بداح إلا لك لزوم وشهوا لزومك قال بداح نعم جاي يا بو فلان اطلب يد البنت . قال ابوها والله يا بن الحلال لو أنك بدوي كان عطيتك ايها فالحال لكن علشان أنك حضري وحننا بدو لازم نشاورها هي تبيك ولا لا يوم شاورها ابوها وايلها سبق وان لاحظت في مدة الثلاثة الايام التي امضاها عندهم في الضيافة اثناء لعب اخوانها هم وياه الضحى والعصر على الخيل كان يلحق اخوانها اثناء العرض على الخيل ويغلبهم ويحتضنهم هو الحاله . ويكون له في هذه الحاله تقديراً عن والدهم فقالت البنت أفاء يا ييه أغترت في

الحضري يوم أنه يلحق ربنا ويحضنهم هذا حيثنه لعب وعرض قدأما والا لو هو هوش ما هاش ولا أقدم هذا خيال قرى زين تصفيح فقط اي أنه ما غير منظر فقط . فلما سمعها بداح زعل وتأثر فقال يا فلانة قولي آمين قالت آمين قال عساء الله ان يجيب اليوم اللي اوريك فعلي فيه ويين ويريد الله وتقبل دعوة بداح العنقري ويصبحونهم قبيلة الفضول ويكسرونهم ويأخذونهم وطول النهار وهم معهم في حرب وقتال ومقاومه وأخذوهم فلما جاء العصر ويرسل له امير القوم اللي معهم البنت ينخاه بالفرعة فقال بداح ما أفزع لين تجيني فلانه (يعني البنت) وتنخاني ثلاثين مرة وطلبوا منها أنها تنخاه ورفضت قالت أمس أنا هازبته واليوم أنخاه لا والله فسمعتها عجوز عندهم .

وقالت مشينا أنا واياك وجيت هي وياها وقالت تكفاء ياالعنقري عشر ويتبعها عشرين هاذي ثلاثين . وفعلأ يفزع العنقري ويجي للقوم قال يا قوم اللي يبي العافيه يبعد واللي يبي الشر يتبين وعيوا وصاح فيهم بداح وفدع فيهم حتى شق صفوف الرجال وذبح منهم حتى انتصر عليهم وكلما انتصر على فارس أخذ عنان فرسه وجمع الأعنة جميع وعطاهن البنت وقال خليهن عندك أمانه حتى اسألك عنها ويوم شبوا نار العز والانتصار قام الامير ينشدهم عن انتصاراتهم ووقعهم وكلن يقوله وش عمل اللي أنا سويت واللي يقول كذا فقالت البنت يا بيه الحكمي ما ينفع اللي قالع فرس خله يجيب عنانها فقربت المجموعة الكبيرة من الأعنة اللي عطاها بداح العنقري فقالت هذا اللي جاب بداح وترى الرجال يحرمون علي غيره ما أبي إلا هو للزواج فقال بداح تسمح لي ياأمير اسمعك هالابيات فقال :-

وراك تزهد يا أريش العين فينا

وتقول خيال القرى زين تصفيح

تر الظفر ماهوب للضاعينا
 مقسم بين الوجيه المفاليج
 البدو واللي بالقري ساكنينا
 كل عطاه الله من هبة الريح
 الله لحد ياما غزينا وجينا
 وياما ركبناهن عصير مراويح
 وياما غزيناهم ويا ماغزينا
 بمصقلات في يدينا ذوابيح
 يوم الفضول بحتك شارعينا
 والخيل باخوانك سوات الزنانيج
 الي انكسر رمحي جذبت السنيـنا
 وخليت عنك الخيل صمّ مدايـح
 والصدق عندك ميرلا تجحدينا
 هيا عطينا الصدق يا زينه الريح
 هيا عطينا الصدق هيا عطينا
 واما عطيينه والله لا أصيـح
 لا اصيـح صيحة من غدى جنينا
 ولا خلوج ضيعوها السراريـح
 لي صاحب نهده كما طلع تينا
 عنهن جديد الثوب غادي تشاليج

صخف بلطف باعتدال بلينا
لا مشم البصر ولا هن تفافيح
يا عود ريحان بجال البطينا
ومنين ما هب الهواء بان له ريح

فلما كمل القصيده أمامهم وهم يسمعون جميعاً شامت نفسه عنها وقال لها
تراك تحرمين علي ما ابيك ويركل فرسه ويذهب وهي تلحق به حتى تاهت على
جرة الفرس وتدعشرت حالتها ايام ثم ماتت ثم مضيت ايام وجاءت أخت البنت
اللي ماتت الي والدها فقالت هلي ذبح أختي ابذبحه لكونها أجمل من أختها
فقال ابوها أنت أمرأه ما تذبحين الرجال قالت ولو حظني في قصرٍ قدام قصره
وحط لها ابوها قصرٍ قدام قصره وكلما طلع بداح ولا تبين هبلت بالوجه والعيون
والمبسم والجسم والجمال (كنها نجفه) المهم أنه يوم غلق حوالي السنه او اقل ويلاه
ما يقدم ولا يواخر متأثر فعلاً من حبه لها وصار عنده مرض اقعده فجاء واحد من
جماعته يبني يعالجه ولم يجد له علاج قالوا وش مرضه قالوا هذا مرض اسمه
(الوثاب) شيلوه ودوه عند طبيب في قرية ثانية يكوي رجله علسان يطلب من
المرض واللي متولي علاجه صديق له اسمه علي ولما جاء به علي عند اللي يكون
وحموا المخاطر حقت الكوي قال هو لعلي وشي له هالمخاطر قال نبي نكوي
رجليك عن الوثاب قال من يقوله قال الطبيب قال هو لا تكويني يا علي أسمع .

فقال هذه الأبيات :

يا علي هذا الموت ما هوب وثاب
مير الله الله بالكفن والرهاء به

والى حملتوني على اللوح والباب
بالك تحرمن وقفة عن بابه

والى تهايق زين وضاح الأنباب
قله توفى العنقري يا سفاء به

لي صاحب ما هو لغيري بعجاب
لا شافني قامت تلاعج عذابه

ولا شاف احد غيري تلهمم بالاسلاب
ولا شافني من فوق رأسه رماء به

ثم بعد ذلك توفي رحمه الله ولما شالوه على النعش وعلي خويه معه يقول
للناس صلوا عليه . مروا به من عند البيت اللي فيه البنت فلما طلت عليهم
وسألت علي من هو الميت قال لها بداح العنقري يطلبك الحل قالت اصبر شوي
وتطل ثانية قالت قل والله ان هذا بداح قالت قل غيره قال ابد وتقطع ثم تطيح من
السطح ميتة . وتدفن بجانبه وترى هذه السالفة سمعتها من الشاعر والراوي
صالح بن محمد الريس راعي الرس ولا أجزم على صحتها هذا اللي سمعت
والله أعلم .



من قصائد الغزل الجميلة

هذي ثلاث قصائد غزلية جميلة لشعراء معاصرين بس القصايد أعجبتني بقوتها لجمالها مع أن أبياتها قليلة لكنها قوية والا أنا أكثر ميولي للشعر القديم، لكن إلى منه تهياً قصايد مثل هذي زينة وورقة وموضوعها زين، تصلح تنتسولف إن جالها مجال والا طاري والقصايد الجميلة يعني يستفيد منها الشخص، اسم او كلمة او عبارة تطري عليه تذكره شي من هالنوع هالقصايد.

هذا واحد من الشعراء انا ابقول اسمه الى انتهت القصيدة، هذا واحد شاعر مرة من المرات، مودي زوجته لعيادة والعيادة هذي صايرة في عمارة تحتها دكاكين، تحتها محلات، سوق مجمع والعيادة نسائية ما يجيها رجال، دخلت زوجته في العيادة وماسكت سرا ما وصلهما الدور فمل هو من القعود في العيادة وقال اذا خلصوا بيتزلون، قال لولده الصغير الى خلصت امك تراي تحت انتظر علمني لان العيادة، فالسوق مثل ما تقول يتجه شرق، وفيه دكاكين يمين ويسار متنوعة مثل ماتقول محلات نفوتيه، ملابس نساء وملابس أطفال ومحل مواعين ومحل مثل هالاشياء، ساعات وأغراض مكتتية، ومحلات ابو ريالين وأبو ثلاثة ريال، المهم انه سوق عامر، وأكثر رواد هالوسق نساء، والى مدخل السوق هذا متواسي مبلط لكن الى جا تقريبا في نص السوق فيه له زليفة مهيب رفيعة بالحيل يمكن يجي لها في حدود العشرة سانتي، من عقب هذي يرتفع السوق، انا محللها قلت يمكن راعي العمارة أنه رفع البلاط على شان مواصير الدينمو اللي رايحة للخزان يمكن ييها تتغطي، لكن صارت هالزليفة مايفطنون لها الحريم الي

يجون متغطين، وقبل يعثرن فيها ويطيح فيها ناس، هو قاعد مثل ما تقول على كراسي أو محل للانتظار، ويشوف هالحریم، حریم جاين وحریم رايعين وأطفال وهذي حرمة معها شغالة شائلة لها كيستين مقاضي، وهذي توها جاية، وهو قاعد، ودأما ترا الشاعر دقاق نظر الشاعر نظره مثل الكاميرا، بس بدال ما تطلع صورة تطلع أبيات، فيلاحظ وهو دقيق الملاحظة عاد شاعرنا هذا نبيه ودبق لب، يقول هو ان فيه زحمة الحریم، والى فيه واحد مقابله مهوب رايعي دكان هذا هندي يصلح ساعات مثل هالي عندهم دويلبات هندي يصلح ساعات.

وراعي الساعات ما ياخذ حيز واجد، له محل مثل الكبينة قاعد عندها يصلح ساعات، يقول ما درا الا وهالعجيز مسيكية تمشي ما فطنت للزفة، عليها هالعبية وترا بعض الحریم العجز الأولات، الي فيهن دين تتستر وتغمر روحها بالعباءة والغطوة حتو لو هي في قيض، وجت هاك العجيز عليها هاك العباءة الجبرة والناس في قيض، ومتغطية ومتلفلفة، ومعها كيسة زرقاء فيها ليمون وبقدونس، جاية تمشي مافطنت للزفة هذي، بس من يوم عدت رايعي الساعات المسيكية التوت رجلها وعثرت وطاحت وتطيح هاك العجيز طيحة كايدة.

وطاحت مسيكية على وجهها، وعلى كتفها حاطة لزقة، مثل ذا اللزقات الي تحط على الظهر، وطاحت مسيكية، والله مافطن لها أحد الا هالهندي جزاه الله خير، سلامات يا ماما و سلامات يا ماما، ويقوم ويرفعها والى الهندي هالي يصلح ساعات عنده باقي قاروة ماء، ويجي يعطيها اياها قالت جزاك الله خير، والى المسيكية تورمت ركبتها، وانغثت وبعد يمكنها منفلقة بس ماتعلم، يمكن جايها بعد مثل الصعرور بالجبهة يبي من يفركه، قعدت تسمي وتورد على

نفسها، وأعتقدت انها منظولة، وتقرأ على روحها، ما فطن لها أحد غير هالرجال الهندي، ويمكن حرمة عجلة سلمت عليها وتشافت لها ومشت، هذا منظر.

وافطنوا للمنظر الثاني وشلون يقول الشاعر طبعاً هو ما يقدر بجيها يلمسها، صحيح انه يقول سلامات ياخاله ما تشوفين شر وعود لمكانه ينتظر اهله يجون وعينه تناظر الريح والجاي كنه مروحة قعادية وهو ينتظر اهله ويطالع جهة الغرب وإلى مجموعة هكا الحريم جاين أغلبهم بنات وإلى الزين بين كل يكشفه حتى لو من بعيد المهم البنات جاين ويمكن انهم طالعين مثلاً من تدريب كمبيوتر او مثل هالنوع، وإلى وحدة منهن صايرة في النص طويلة وكل شوي تصلح شيلتها ومتسترة ويبدو هذي البنت من ممشاها أنها يمكن أول سنة بادية تطلع من البيت ما بعد ركدت في ممشاها، البنت إذا صارت طلعتها للسوق أول مرة ما تعرف تمشي ساعة تعثر في العباة وساعة تكلم اللي جنبها وساعة تفشل وساعة تكرر من الضحك.

المهم وهم مارين البنات واقبلوا على مكان الزلفة ما فطنت البنت نفس الشيء مثل العجوز يمكن كانت تكلم اللي جنبها ولا فطنت وتطيح هذيك الطيحة اللي ما امداها حتى تظف العباة وطاحت على جنبها الايسر وانفتشت شيلتها شوي بس غطتها اللي جنبها بسرعة ويقول الشاعر انه لمحها وطاحت الين جاء جهة خدها على الأرض وتملت تراب وتساعدتها اللي جنبها وتلملم روحها والي في السوق كلهم صاحوا سلامات وما تشوفين شر حتى الاجانب اما يوم تطيح العجوز ما فطن لها احد يمكن انها الى هالحين تون مسكينة وهذي البنت من يوم طاحت كل اللي في السوق سموا عليها، بلسان واحد سلامات سلامات لجه كنه داخل هدف. فعاد الشاعر وصف هالمنظر بالايات هذي:

شفتها تمشي بدل واختيال
 فارعة بالطول من هو قدها
 الحيا والطيب مع زود الجمال
 والعيون السود يقتل حدها
 لكن الاقدار ما عنها محال
 لو تقوم الخلق تاقف ضدها
 فز قلبي يوم شفت الزين مال
 وعبرت دمة تعبت بصددها
 وعشرت وسط الملا بنت الحلال
 واتضح صوت الخجل في ردها
 وانكسر في عشرته سيف الدلال
 وانحنى غصن الفرح في يدها
 قمت الوم الارض نهر الشوق سال
 كيف طاحت ما قويتي ردها
 قالت بنشوة وردت باعتدال
 الوله والشوق يمي شدها
 ما قصدت السو في جسم الغزال
 مقصدي كله اقبل خدها

والقصيدة هذي للشاعر محمد السليمان الضالع من أهل بريدة . سمعتها منه
 الله يذكره بالخير .

وفيه قصيدة ثانية غزلية رقيقة لشاعر معاصر اسمه خالد البقمي فيها وصف جميل ومناسبة القصيدة انه كان يعيش في السوق العصر ووقت العصر وقت انطلاق الشوف واللي يناظر من جهة الغرب للشرق تكشف له كل شيء يقول يوم جو بنات مساير متقدمتهن ذيك الوحدة عليها عباة وياين من اللمعة أن الراس مكدود وتمشي وتحرك يديها بدلال كنها شايلة طفل فقال هالايات هذي يقول :

تحت العباة اللي سوات المخيلة
تضفي ويفضحها من الحسن براق
جتنني نجر الزين عنقا طويلة
طرقا تغريف من طويلات الاعناق
يلمع شعاع الشمس فوق الجديلة
عصير يوم اني صدفته بالاوفاق
كن الترف طفل يديها تشيله
ام الحنان اللي من الرمش دفاق
وكن البحر موج العيون الكحيلة
وغر المزون البيض في سود الاحداق
ومنين ما لديت فيها جميلة
مثل الذي باذهانكم ياهل الاذواق
حديثها ذكرى القمر كل ليلة
واحساسها مثل الندى فوق الاوراق

ما للفؤاد الى انجذب فيه حيلة
 تثير مجنون العواطف والاشواق
 حاولت الاطف خاطره واستميله
 يوم انها جتني وانا جيت عشاق
 قلت الحياة ايام قالت قليلة
 ما ينبغي حب يجي بعده افراق
 تقبلت علمي وردت بديله
 وما استر صدري من جوابه ولا ضاق
 غنج الغواني في وقار الفضيلة
 هذا الجمال اللي تتوجه الاخلاق
 وراحت وانا ما ادري من اية قبيلة
 الا انها نجدية تسبي الاعماق

هذي قصيدة خالد البقمي وصف ولا بين او فضح بالبنت وهذا ترى من
 الاصول ومن الستر ومن المناهج اللي يشون عليها الشعراء العاقلين مثل ما قال
 شاعرنا في بيته الاخير وقفت وانا مدري من اية قبيلة الا انها نجدية تسبي
 الاعمى، وهالبيت هذا يذكركنا بشاعر من شعراء الاولين يقال له عبدالوهاب بن
 عبدالعزيز الفياض -رحمة الله عليه- وقال ابيات جميلة دايمة يغنونها اهل
 السامري يقول فيها:

امس في سوق مدري عارضتني غزالي
 في فريق ما عرفه وان عرفته نسيته

ما اقدر اسميه من خوفي يجي له مجالي
مغدي المقرد لا يدلون بيته

التقينا بلا ميعاد والسوق خالي
سمت منه الوصال وباعني واشتريته

يا خليفة هلي لا يا بعد من غدالي
ارحم اللي بحبك عاف حيه وميته

الهوى بالهوى ما فيه ذلك وذالي
حاجته لا بدت لو ما طلبني عطيته

هذي من القصايد الجميلة واللي ما تبين الاسم ولا في أي مكان وهذا يعتبر
من الستر في مواضيع الغزل العفيف .





الجار ولو جار

السالفة التالية عن الجيران، ومعروف أن الجار له حق على جاره ومع الأسف في الايام هذي والسنين التالية صاروا الجيران ما يعرفون بعضهم بعض، من اول يوم انهم في بيوت صغار ومتقاربين وهم احسن حال كنهم عايلة وحدة الى غاب الواحد عن اهله والى جاره يسد مكانه كأنه ما سافر ولا غاب من حسن الجوار، اما الحين الله يكافينا الشر غدوا الناس اكثرهم في هالحارات الجديدة كنهم جيران مقبرة ما يعرف بعضهم بعض وبعد الصلة بين النسوان والحريم اكثر من الرجال ويحطن في الحارة دورية بيناتهم اللي جاية بريق النعناع والثانية جاية زمزية شاهي والثالثة جاية مثل ما تقول اكل .

بعض الحريم دبقة لبقة في الطبخ وخاصة اكالات الشتاء ولو يطيعون شوري البنات اللي في هالوقت كان يتركون عنهم التدبير المنزلي والطبخة ١١٣ والطبخة ثمانين كلها خرابيط . تعلموا من العجز الموجودين عندكم قبل يموتن وتمنون تصلحون مثلهم القرصان وخبز الرقاق والمرقوق والجريش بعض العجز الى صلحوا الجريش وجابوه في الماعون والى كنه نيفيا حتى زين للمشق من زينه خابر من اول عندنا عجوز الله يرحمها الى صلحت الصبيب تصب بالملعقة على المقرصة وجنبتها بنت ثانية تقشع يسمونه صبيب ويهذون معه بصل صغير ويطلع وش زينه لاهو ني مرة ولا هو مستوي بالحيل هالاكالات انفع من بعض الوجبات السريعة اللي قامت تخلف امراض ، نرجع لموضوع الجيران فيه سالفة يقولها لي محمد السبيل اللي جده الشاعر عبدالله بن سبيل ، يقول אני جيت للرياض من

ديرته نفي معزوم عند نسيينا ابتغدى عنده وبكرا عازمني رجال ثاني فيقول محمد
 البسيل سالت نسيينا وكان مستأجر في حارة وقلت له انا معزوم عند فلان وعلى
 وصفه انه حولكم مهوب بعيد عنكم قال له والله ما ادري وين بيته كل يوم ينزل
 واحد ويروح واحد بيوت اجار ومن كل بلد ولد والمدينة مهيب مثل القرية بس
 اتصل عليه وواعده في مكان يجي ياخذك قال له اجل ودني لم مكان معروف
 وحطه في مكان واتصل على اللي هو عازمه وقال له تعال خذني انا في المكان
 الفلاني ونسييه راح المهم يوم جا واخذه اللي عازمه وما دريت الا يوم نزلني والاه
 حول بيت نسيينا ما بينهم الا يمكن اربعة بيوت ويقول ما علمته ان بيت نسيينا اللي
 جاي من عنده انه هذا هو وسكت، وعقب الغداء قام بيوديه قال محمد بن سبيل
 لا انا ادل وابروح له فيوم وصل لبيت نسييه قال له تدري وين انا كنت معزوم قال
 وين قال شفه رابع بيت كيف ما تعرف جيرانك قال له والله ما ادري انا اول شيء
 توني نازل ولا ادري عن الجيران كل شوي ينزل واحد.

فقال الشاعر/ محمد بن سبيل بهذه المناسبة الأبيات التالية :

كيف بعض الناس ما يدري بجاره
 ما يعرف اسمه ولا يذكر وصفه
 رحت قبل أمس معزوم وسط حاره
 شفت راعي بيت وفرحت لوقوفه
 قلت بيت فلان وينه باعتباره
 ساكن حولك وحنّا من ضيوفه
 قال ما يوجد ولا راعي عماره
 عندنا واسمه فلان ولا نشوفه

وقبل يكمل صاحب البيت العبارة
جاء معز بنا وكثر في حلوفه

يا عرب ويلا جداره في جداره
كل منهم يشتكي قسوة ظروفه

فارجع واقول أن الجار الرسول اللهم صلي وسلم عليه وصي على سابع
جار، وايضا في الحديث قال الرسول صلى الله عليه وسلم (ما زال جبريل
يوصيني بالجار حتى ظننت انه سيورثه)، واتذكر سألقة مبطية قالوا فلان باع بيته
على واحد وقال له انا بعت لك البيت بس فيه شيء ما بعتك اياه اللي هو مجورة
جارنا اللي حنا وياه من عشرين سنة هذي هي اللي ما تباع ولا لها ثمن ولا
صك، والجيران من أول في الحارات القديمة كان بينهم كل ليلة دائرة مرة عند
فلان ومرة عند ثاني ولا فيها تكلف احيانا تكون بين المغرب والعشاء قهوة
وشاهي وسوالف ويسألون عن اخبار فلان وان كان فيه واحد مريض راحوا
يزورونه ويسلمون عليه او فلان ثاني ولده صاير عليه حادث لا سمح الله
ويزورونه أما الحين اعوذ بالله الجار ما يعرف جاره ولا يدري من هو وبعض
المرات تصير سرقات في البيوت ولا يدرون، يقولون واحد مسروق بيته وجاين
ناس داخلين البيت ولا اكتشف جاره ان هذولاء غرباء لان ما بيته وبينه صلة
ويمكن بعضهم ما يسلمون وان كانه جيد حرك يده وقال له مسيك بالخير، وبصير
بعض المرات مع للأسف مشاحنات بين الجيران اما عند موقف سيارة والا عند
ماء طالع ومثل هالامور ما ودك تصير بين الجيران او مثل واحد من البزران طق
واحد بزر ثاني وتكبر لان اول ما تبدأ بين العيال الصغار ثم تبدأ مع الحريم ثم
توصل عاد للكبار هذي كلها امور مهيب طيبة، فنرجع ونقول الجار ما زال له حق
المفروض تزور جارك وتبادل الهدايا وتراعي ظروفه ولا تضايقه وان كان عندك

سواق لا تخليه واقف عند باب الجيران يضايقهم ما يعرفون الحريم يدخلون او
بعض الناس يحط له مجلس في عاير ولا يعرفون النسوان يدخلون او يطلعون
قبال باب الجيران ، فيه قصيدة جيدة في هالموضوع للشاعر بدر بن عواد الحويفي
شاعر من شعراء قبيلة حرب المعروفين يقول :

حنا بدور شفت فيه الغياره
تغيرت بعض الطبايع والأفكار
يا ناس حق الجار يعطى جواره
ما هوب حق الجار ما ياصل الجار
الجار يمضي عام ما زار جاره
لو المسافة بينهم خمسة أمتار
وياجب علينا للمريض الزياره
ياللي عن الواجب تسوون الأعذار
و أنا ماعم الناس وجهت أشاره
وجهة نظر و الناس كل له أنظار
وياما من أهل الخير في كل حاره
اللي لهم بالجود مارد ومصدار
ما الهتهم الدنيا وجمع التجاره
دنيا ودين وكل شي بمقدار
لومي على اللي فيه كبر وجباره
مغرور غافل و المتايا بالأعمار

بالريح لو يدري ومر الخساره
 بالماقف اللي فيه تشخيص الأبصار
 يوم الحساب اللي رهيب انتظاره
 تشهد جوارحنا على كشف الأسرار
 ماقف نصف وحساب ما به شطاره
 عسى لنا من ساعة الضيق مظهر
 ولا بد لا مد السراط انحشاره
 يفقد بها العاصي كيانه وينهار
 وأعمارنا وأموالنا مستعاره
 وقدامنا جنة وقدامنا نار
 واللي سكن بعشاش واللي عماره
 يفنى ويبقى اللي على الخلق قهار
 اللي خلق خلقه وقرر قراره
 ونفذ بهم حكمه بتحكيم وأقدار
 سبحان عزال الدجى من نهاره
 اللي حمل موسى على موج الأبحار
 وجار النبي لو كان موذيه زاره
 ما واخذه لو كان من قوم كفار
 والجار ما ينظر بعين الحقاره
 عند الرجال اللي لهم بالفخر كار

الجار له قيمة وواجب وقاره
 والحاجز اللي بيننا ساس وجدار
 خوذوا حديث المصطفى باعتباره
 باللي غمركم بالجهل موج تيار
 من ميزة المسلم وخيرة مساره
 ياخذ من السنة دلائل و تعبار
 انصح وكل منهجه باختباره
 عسى لها تأثير بنفوس الأحرار
 و اخير من طول المجال اختصاره
 تمت وصلى الله على سيد الأبرار

هذي قصيدة الشاعر بدر الحويضي وتعتبر من القصائد النادرة في حق الجار وتعتبر
 مثل الدرس تذكر فيها حقوق الجار من زيارته ومهما اخطأ عليك ما تواخذه ولا
 تعاسره مهوب مثل هالايام في أيام القيض الى صار عند احد الجيران شجرة تظلل
 قبال الباب للسيارة ويجي واحد من عيال الجيران البعيدين ويوقف تحت الشجرة
 وهذا ما يصلح وعيب يعني تعرف أن هالمكان لموقف سيارة جاركم وعند بابيه ومحله
 والشجرة هذي ما حطها عبث واكيد حاطها ظلال لسيارته، والا بعض الناس يجيب
 سيارته ويحطها قبال باب جاره ويدري ان هالباب يدخل معه نسوان والا مقاضي او
 باب كراج يدخل سيارته داخل البيت واصلا معروف ان باب الكراج ما يبي من يكتب
 عليه ممنوع الوقوف واضح انه ممنوع الوقوف . هذا والله الموفق والسلام .



تمر الصوام

كان في زمان مضاء قبل حوالي المائة سنة وفي بلد جنوبيه سدير يوجد الشيخ / علي بن سند رحمه الله تعالى أمام لمسجد الجنوبية وكان رحمه رجل زاهد عفيف ورع عطوف على الفقراء والمعوزين وصاحب أمانه وخلق عظيم وله عند جماعته وقار وهيبه ورجل دين محبوب يحبه الجميع لنزاهة أخلاقه وسلوكه وكانوا الناس من أهل الخير والفلايح يودعون عنده تمر الصوام لشهر رمضان المبارك من أجل توزيعه عليهم كل يوم من أيام الصوم (كل يوم بيومه بالتساوي) فحصل في إحدى السنوات على البلد جفاف عظيم أصاب معظم نخيل البلد حتى أنها غارت بعض الأبار التي تسقي النخيل وكان من ضمن ممن أصيب نخيلهم ومزرعتهم بالجفاف المدعو / إبراهيم البقعي الذي يبدو والله أعلم أن نخله ومزرعته في طرف البلاد وهو صاحب عائلة كبيرة فيهم الشيبان والنساء والأطفال ولم يجد ما يعيشهم لا من تمر ولا عيش ومعدوم ذات اليد فضاقت به الحيل ولا يدري كيف يتصرف .

فجاء إلى ابن سند وطلب منه تمر ينقذ به العائلة الذين يعولهم وعطاه بعض الشي لسد حاجتهم فقط مره مرتين ثلاث ولما طاول عليه الأمر امتنع ابن سند من اعطائه وقال له هذا تمر الصوام ما اقدر اعطيك كل مرة وكأنه تشدد عليه فغضب البقعي وكاد ان يتصرف تصرف اهوج وعزم على بيع ملكه من النخل وقال اجل الى صرت متتب معطين تمر انقذ به عيلاني خرج على النخل تراي ابا ابيعه باللي هو يسوى .

وكان ابن سند في ذيك اللحظة حلیم وخاف عليه من تصرفه الأعماء ان يبيعه بيع رخيص ولا فيه رجعه لأنه كان عجل بالخیل وابن سند رحوم وحلیم وهذا ملك ما یباع ابداً اذا باع الإنسان ملكه اللی ما عنده إلا هو کیف یسوی .

فقاله ابن سند وشتی بیعه به قال البقی حرج علیه : قال ابن سند راح سطر النخل بوزنتین تمر قال البقی تم وعطاه ابن سند وزنتین وشراء منه سطر نخل (السطر یمكن یجی أقل من سبع نخلات) الله أعلم وكتب علیه ابن سند ورقة مبیعه وشهد علیه اثین المهم قضت الوزنتین وجاء ثانی مره وباع علیه السطر اللی عقبه بعد بوزنین وراح وقت وخلصت الوزنتین وابن سند یكتب علیه ویبیع من تمر الصوام واستمر البقی علی هالحال الین باع النخل كله علی ابن سند وفي النهاية كتب علیه اب سند ورقة بمشترأ النخل كله وابن سند كان ناوی فی ضمیره نية طيبة لكن لم یخبره بها الحاصل أنها مضت الأيام ومر علیهم حوالی الستین والوقت قحط لم یغاثوا ولا جاء سیل علی الدیره ابداً .

بعد ذلك دخلت السنة الثالثة وجاب الله الخیر وكثرة الأمطار والسیول وزانت الأرض بالأعشاب والخضرة فی كل مكان من الدیره والنخل لا یزال فی ملك ابن سند وحملت النخیل بالثمرة الكثیرة والطیبة من التمرور قام ابن سند علی النخل وواجر علیه من یلقحه ثم یكرّبه ویركبه وكل الأمور اللازمة لمتابعة الثمرة إلى أن استوت الثمرة وهو فی روس النخل وكل اللی هو یصرفه ابن سند علی النخیل مسجله فی ورقة یوم خلص ما بقی إلا الصرام حتی ان كل الناس من أهل الدیره صرموا نخیلهم الا هو یوم جاء یوم من الأيام ویلاههم بعد صلاة الفجر فی المسجد جالسین بعد الصلاة یسبحون ویهللون وكان البقی علی ین المؤذن

بشخصين في الروضة تقدم له الأمام اللي هو ابن سند وقاله يابراهيم دوك هالطبخه من القهوة رح أحمسها وزين القهوة الين أجي لك في البيت ابر بيتي واجي اتقهوى عندك . فعلاً راح البقعي وصلح القهوة وشب الضو وتزهب لجة ابن سند وابن سند مرييته وجاب معه ورقة مبايعة النخل والورقة اللي فيها مصاريفه على النخل يوم دخل عند البقعي في القهوة وجلسوا حول الوجار قال ابن سند وراك يا ابراهيم ما صرمت النخل قال الله يهديك يا مطوع تهزاء بي ذاك يومه على حظي هالحين الله يبارك لك فيه ماعد هوب لي قال ابن سند لا بالله إلى هالحين وهو لك أنا كل هالسنين اللي مضت حفاظ لك يالبقعي الملك ما هوب يباع لكن أنا خفت عليك ذيك الأيام تبيعه مع العجلة على واحد ما يردو لك ولذا شريته منك بتمر من تمر الصوام وهالحين هذي ورقة البيع شفها فالضو وهذي ملكيتك الأصلية لك وهذا المبلغ اللي أنا خسرتة على تجهيزه في اللقاح والتركيب وغيره وهالحين نخلك لك .

وفي ذيك اللحظة تجهش صدر البقعي وبكاء من الفرحة عقب يومه فقير صار غني وتشكر من فعل ابن سند الطيب وصبره عليه وعدم طمعه قال ابن سند أنا يوم اشريه منك ناوي أردو لك لأن الملك ما يباع لوك بايعه على غيري ما رده أحمد الله على ما حصلك من فعل الخير الله سبحانه ما يضيع خلقه وخاصته اللي مثلك يكد على عايله فيهم الصغار والمسنين والعجزة من النساء والأطفال وهذا في الحقيقة شأن الطيبين والأخيار الله يكثرهم .

وبهذه المناسبة قال الشاعر المعاصر لا حداث هذه القصة الشاعر / صالح بن عبدالعزيز المنقور هذه القصيدة التي تبرز عمل ابن سند وتثني على فعله الجميل أثناه الله ورحم الله الجميع يقول المنقور :

يا بن سند يا عـشـير الناس
يا طيب الجاه والسيـره
عنيت لك يا صليب الراس
يوم النخل نشفت بيـره
وحملت هم بغير قياس
ويا لله عساء فالأمر خير
والناس يا مسندي بالناس
والرجل يعرف بتقديره
وابن سند قـالـي لا باس
أشـريـه وأنقل مخاسيره
وتم المبايع على القرطاس
وشهـودنا من هل الديـره
وابن سند كنه القـرـناس
لآمن كل نهم طيـره
صافي الذهب ما يصير نحاس
والبيشله ما تجي نيره
وابن سند متعب المحماس
فالقلّ تكثر مساييره
عقب العصر نجمع جلاس
نسمع حديثه وتفسيره

أن جيت ابفطر لقيت اجناس
 صوام تفطر على خير
 عشرين عام خلت يباس
 بأحكام ربي وتدبيره
 يا ناس لا تقطعون الياس
 الغيث بانت بواشيره
 هلت على نخيل كل الناس
 كلن يوسع معايره
 وجاب الوثيقة قوي الباس
 وردّ النخل طيب السيره
 الله يثيبه رفيع الساس
 ويعوضه ربنا بغيره
 وإلى لقاء آخر مع سالفه وقصيدة أخرى .



القهوة

القصة او السالفة التالية عن القهوة، الحقيقة القهوة شأنها عظيم كونها تمثل الضيافة العربية، اول مايجي الضيف يقلط على القهوة ودايماً الناس يقولون تفضل عندنا على القهوة، ف منول الناس اذا بغوا يبنون البيوت يهتمون بشأن المجلس لأنه هو واجهة البيت ويسمى القهوة لأن القهوة تصلح فيه، والقهوة واقصد المجلس يكبرونها عشان تستوعب الرجال، وفي السابق مرة ماكان عند كل الناس معامل للقهوه، كان فيه في القرايا قهوة يسمونها (قهوة الجماعة) يجتمعون فيها كلهم اذا عزموا ضيف، وآلف عن القهوة كتب عديده، ومن خلال قراءاتي في الكتب اللي عن القهوة والاشربة اللي سمعتها ومن افواه الشعار استنتجت في نظري ان فيه خمسة اشخاص اشتهروا بموضوع القهوة وورد في شأنهم قصيد:

١ - دغيم ابن بشير الظلماوي، مات رحمة الله عليه عام ١٣٢٤هـ وسموه (راعي الوالمة) لأن قهوته جاهزة دايماً، قهوته وديوانيته وضوء ودلاله كنه اسعاف ٢٤ ساعه شغال، أي ضيف يجي يلقي القهوة جاهزة، في أي وقت.

٢ - زيد الخوير من الخوره من قفار من حائل، اشتهر بتصليحه للقهوة، يتقنها بالحيل، واستشهدوا به الشعار في كثير من قصايدهم، وله قصيدة عن القهوة، معروفة.

٣ - علوش ابن ظويهر اشتهر في معرفة طعم القهوة، يعرف طعمها لو يخالطها أي شي يعرفه.

٤ - محمد ابن عبدالله القاضي اشتهر هذا في المقادير اللي تحط مع القهوة من الهيل والزعفران والمسمار والشمطري و العنبر ومتى تحمس وشلون حمستها يعني طريقة تصليحها او اعدادها .

٥ - شاعر معاصر الآن موجود واللي هو الشاعر عبدالله بن علي بن صقيه التميمي ، الحقيقة هذا وضّح في قصيدة من قصايدہ قال خمسة اشخاص الى من القهوة جهزت تبديهم بالفنجال قبل وخمسة تخليهم اخر شي ، وذكرهم منهم الظفر والشجاع والكریم واللي يفك الديات ، عدهم وعد الباقيين . .

لكن بالنسبة لدغيم الظلماوي ذاع صيته في وقت امير حایل محمد ابن رشيد هاك الحين يمكن في حدود عام ١٢٨٠-١٢٩٠ هـ ، واشتهرت قصيدة له يسند فيها على ولد اخوه ، واسمه كليب وهو اللي عنده في القهوة كنه ولده ، حسب الرواية اللي سمعتها ويسند على ولد اخوه ويقول :

يا كليب شب النار يا كليب شبه

عليك شبه والخطب لك يجابي

علي انا يا كليب هيله وحبّه

وعليك تقليط الدلال العذابـي

ادغث لها يا كليب من سمر جبّه

وشبه الى منه غفا كل هابـي

باغي الى شبيت ثم قبّـه

تجلب لنا ربعن سرات غيابـي

بنسرية ياكليب صلف مهبّه
 لا هب نسناسه تقل سم دابي
 سراة بليل وناطحين مهبّه
 متكتفين وسوقهم بالعقابابي
 الوالة ياكليب عجل بصبّه
 والرزق عند اللي ينشي السحابي
 وصبه لنعور الى جاه نبّه
 يرخص بعمره والدخن له ضبابي
 وصبه لقرم صرفته ماحسبّه
 يوم البخيل مكنهف الوجه هابي
 وعده عن اللي مايداري المسبّه
 اللي يدور بالقصير الغيابابي
 لاباطن الهلباج خطو الجلبّه
 يازين خبط عصيهم بالركابابي
 اطمر لهم وابدي سلام المحبّه
 لا دبّر الهين متين العلابابي
 سلام احلى من شخاليل جبّه
 واحلى من السمن الحديد العرابي
 مع كبش مصالح لراسه نجبّه
 من مذبح السكين حن الركابابي

خطوا الولد يوم الملاقى نكبّه
 ياتي علينا من حساب الزهابي
 حتى ايش لو يلبس زبون وجبّه
 معيرة على غضير الشبابي
 انا لقيت الصبر ياحلو غبّه
 يرقيك روس مشمرخات الهضابي
 ومن لاصبر يا كليب في حكم ربه
 هذاك يوم البعث ماله ثوابي
 يقولها اللي ماحكى بالمسبّه
 ولا عرقل الاجواد بكثر الهلابي
 هذا هوى بالي وهذا مطبّه
 من قبل لا يكتنح علينا الترابي

هذي قصيدة دغيم اللي قالها واشتهرت في وقتها وصار لها شان وتناقلوها
 الناس، وبشرح بعض الكلام الغامض في القصيدة واللي مهوب معروف،
 يوم يقول دغيم:

الوالمة يا كليب عجل بصبّه
 والرزق عند اللي ينش السحابي

لين قال:

سلام احلى من شخاليل جبّه
 واحلى من السمن الجديد العرابي

جبه مدينة من مدن حایل ويقصد بشخايلها القلات اللي في علو الجبال يصير فيها ماء حلو وينزل منه مثل الشخايل مطر فيتلقونه ويسوون منه القهوة، والسمن الجديد العراقي اللي توه جاي من البر .

مع كبش مصالح لراسه نجبه من مذبح السكين حن الركابي

الطلي اللي نذبحه للضيف ، و من مذبح السكين حنا ركابي كانت عادات العرب في السابق اذا جاهم الضيف وذبحوا له ذبيحة يقوم راعي البيت ويحط يده في الدم ثم يحطها على رقبة ناقة الضيف تصير مثل ختم الوارد في رقبة ذلوله اللي هو جاي عليها، علشان اذا راح هالضيف لناس ثانين يدرون انه يستحق ذبيحة ويستاهل الاكرام وانهم قد كرموه الفلان قبل .

خطو الولد يوم الملاقى نكبه ياتي علينا من حساب الزهابي

يقول خطوا الولد أي بعض العيال اذا جا وقت المغزى وراح معنا نعتبره كنه من العفش لأنه مهوب ظفر وشجاع .
اما بقية القصيدة تقريبا واضح ومعروف .

بعض الحكام والامراء في هاك الوقت ينغاض ويغار مايبي غيره من عامة الناس يصير هو المشهور بالكرم وله صيت بينهم ، وده انه هو الكرم والمعروف ، فعقب مااشتهرت القصيدة وانتشرت وصار لها شان ، وصلت لامير حایل محمد ابن رشيد ، وابن رشيد مايعرف دغيم ولايعرف قهوته وماقد جاه ، فقال لبعض اخويه الخاصين نبي نروح نشوف هالشمرلي اللي يقول يا كليب يا كليب .

الوالمة ياكليب عجل بصبّه، هو صدق والمة عنده والا لا! فخص على بعض
من ربه القريين وراحوا له في وقت مايتوقع ان احد يجيه فيه

مثل ماتقول في ليلة شتاء طويل، المهم يوم نوّخوا عنده ودخلوا في البيت
والا والله ان الضوحية عامرة والدلة زاهية وهو اللي يقوم ويصب لهم من الواله
اللي عنده ويوم ناظرهم والا والله هذا محمد ابن رشيد الامير، ولا يوم استحي
دغيم وحس ان فيه شي وخاف وش سنح هالمسيار!

ويوم انه زاد حطب وزادت النار اشتعال طالع وشاف وجه الامير كن عليه
اثر غضب و مهوب راضي، فالتفت الامير عليه وقال له:

يادغيم. قال: خير؟ قال: يوم انك تقوصد ياكليب ياكليب، وش عندك به؟
فعرف دغيم ان الامير زعلان ومايي احد يصير له صيت اكبر من صيته وارتجل
وقام له وسلّم عليه وفي سلامه عليه قال له ابيات ارتجلها ومعنى الابيات: لولا
وجودك امير لنا وانك انت اللي حنا في حمايتك كان ماشيينا الضو ولا قلت
ياكليب شب، وكل هذا بوجودك وعزك..

والابيات تقول:

مدّه رهن لولاك ماقلت ياكليب
ولا قلت شب النار صر موقداً له

في ليلة تجدع سواة المشاهيب
نسرّة تلصق خليل بخلّه

من كل فج ياصلنك مناجيب
ما هو غلاء بالظيغمي مير ذلة

نظمن بعزك يا حصان الاطاليب
 لعل جامع حزمته ما يفله
 يا جواهر الناريز بالمسك بالطيب
 يا عنبر من جربله ما يملله
 تملا محاليب وتكفي محاليب
 وكبد تيسرها وكبد تبلله
 ياطير شلوى مالقي بك عذاريب
 لو تستحي ما تجمع الطيب كله
 يا ابو الارامل واليتامى ومن عيب
 وابو لمن كان العصا ثالث له
 وابو المحرول والعمى والمحاديب
 ومن ضامته بقعا تصير ولد له
 ان كان هرجي به عليكم عذاريب
 سامح عسى اللي عقبك لالف حله

ويوم سمع ابن الرشيد هالايات والمدح زال غضبه ورضى عنه وقال له بيض
 الله وجهك على هالقصيدة والكرم، فتقهوى عنده وقال له وهو طالع : تشوف
 يادغيم؟ قال : ايه . قال : تراك من خاصيتنا ومن القريبين عندنا وكل ما ينوبك من
 القهوة والدلال ابشر انه على حسابنا لين تموت ، قال : الله يطول بعمرك ودعا
 له ، والحقيقة هذا شان حكام الجزيرة العربية كلهم الى الان وحتى سكان الخليج
 والعرب عموما يحبون الشخص الكريم واللي سمعته طيبة ويكرموناه .

كل شخص له صيت طيب يا في كرم او في انه ينفق امواله في سبيل الخير
تحتضنه الدولة دائما وتكرمه وتسهّل مهماته ، هذا شأن الحكام كلهم وهو يستاهل
هالتكریم .

ولكن العجبه في بيتين من قصيدته في ابن الرشيد يوم يقول :

يا ابو الارامل واليتامى ومن عيب
وابو لمن كان العصا ثالث له
وابو المحرول والعمى والمحاديث
ومن ضامته بقعا تصير ولد له
جمع ثمانية اشخاص اللي تحل لهم الزكاة .

اشتهرت هالقصيدتين لدغيم حتى بعد وفاته ، مات في عام ١٣٢٤ بينا وبينه
حوالي ١٠٣ سنين .

وزيد الخوير اشتهر بتصليح القهوة وصار معروف بهالشي وقاموا يستشهدون
به الشعراء الى حد ان فيه واحد من شعّار عنيزه يمدح جماعة من اهل الزلفي
زايرهم ويقول لشاعرهم يرد عليه ويقول :

مشكور ولا عليكم زود بالحصن المغاوير
ياللي توفر بكم مع هبة الريح النعاره
رجّالهم من حبور رجال اهل نجد المشاهير
حتى لو الوقت ضعضع قوته بقي اعتباره

حماسة الصاع لدلال حوال النار مقطير
من صنع رسلان الاول جد كنعان ابو شاره

البن من سوق ظهران اليمن يجلب قناطير
وبهارها طرانسيب مورّد من قندهاره

وفنجالها ختته يجذب لراعيها المسابير
كن الخوير متولّي حمسته والا بهاره

هذا الشطر الاخير اثبت ان الخوير شاطر في عمل القهوه .

هذه الأبيات من قصيدة للشاعر / علي ابن ابراهيم القري رحمه الله وإلى
لقاء آخر .



بوادر الشيب

السالفة التالية من السوالف اللي اعرف واحفظ ومعها شاهد ابيات والسالفة اجزم انها صحيحة واما القصيدة فانا آخذها من مصدرها لكن السالفة احيان تزيد وتنقص حسب اللي يرويها .

وموضوع السالفة عن غلا الزوج عند زوجته ، دايماً الزوجة تغار على رجلها وماتبي يصير له لفتات ونظرات ثانية حتى لو هي كبيرة في السن ، من يوم يجي تلقاه في البيت ، لكن بعضهن توفق مع الرجل في الكلام الطيب وتستقبله وترقه عنه وتداري خاطره وتشوف وش حاجته اللي هو يبي وكل ماحاول يسأل عن اللي ناقص قالت عسى الله يسلمك ماقصرش كلش تام والخير واجد وعسانا بس ناكل اللي عندنا حتى لو انه في شي ناقص ، وبعضهن اعوذ بالله توذيه بالصياح من يوم يدخل جاي من شغله تعبان وهي ملاطفته ملاطف مثل الجنني بالطلبات نبي كذا وهذا ناقصه كذا ووراك ماجبته ، كلش تخليه في وجهه ، واذا بغى يطلع جابوا له فاتورة وش كبرها كاتبين فيها الطلبات كنها فاتورة مغسلة وبعضها كلها متكرر ماله الا اسبوعين من يوم جابهن .

يجب على الحرمة العاقله المدبرة في البيت تراعي ظروف رجلها وراتبه ولا تفرض عليه فروض فوق طاقته ، بعضهن توذيه وتفرض عليه يتدين علشانها تخاف انه يجمع فلوس وياكر يعرس عليها ، هذا واحد من اللي اعرفهم مدرس والمدرسين محظوظين خاصة مدرسين الابتدائي لأنهم يروحون مبكرين قبل الناس ويرجعون مبكرين ، وواحد من هالمدرسين مستاجر له دور ارضي في قله ،

يمكن له سنه - سنة ونص متزوج وجايب زوجته ومسكنها في الدور، والمره نظيفه ومرتب، من اول ما تدخل مع باب الرجال تشوف هذي مزهرية محطوة هنا وهذا المجلس مصكوك وعليه مفتاحه ومطيب علشان اذا جو الرجال والا ريحته زينه، وكل شي مرتب في البيت وحريصه على شغلها وبيتها ماتخلي شي طايح او منكسر ولا تتكل على الشغالة، وتدرن اذا صارت هي اللي تقوم وتشتغل في بيتها انها تخف وتزين صحتها وتتعود اما اللي تنام الى الضحى، تصير متينه الحاصل ان هالرجال يجي بعض المرات الظهر لأنهم يطلعون مبكرين وخاصة في ايام الشتاء يطلع احيانا قبل اذان الظهر بشوي واذا جا البيت لقي حرمة فارشة زولية متر ونص في مترين في البرنده (البلكونه) اللي تطل على الحديقة وحاطة عليها مركا وجايبه ذيك الطوفرية وعليها دلة فيها ليفة جديدة ومغطاة بفوطه زرقاء وعندها فنجالين وفنجال ثالث محطوط احتياط والا الفنجالين واحد لها والثاني لرجلها، وصحن تمر نظيف انكانه وقت رطب والاه هذا هو كن عليه الغبير وجنبه مويعين ثاني للماء يغط يده، مرتبه كل شغلها مضبوط والثلاجه موله فيها علبه روب او حليب، دارية انه بيعجي الساعه ١١ وربع - ١١ ونص، معودها على هالخزة.

وجا يوم من الايام على حد جيته من الشغل وحوسة هالبزران في المدرسة خاصة طلاب الابتدائي غيثين من الاولى الى الرابعه يبي لهم مدارى هذا يصيح وهذا منشقة مخباته وهذا ضاعت طاقيته وكل شوي ياستاذ وياستاذ، الله يعينه عليهم، المهم يوم انه وصل وتقهى معها قالت له: تبي اجيب لك لبن والا حليب؟ قال: اياهن ازين؟ قالت: اللي تبي، قال: تدرين. حليب، وتجب هاك

الحليب البارد وتعطيه اياه ويشربه والا له معلق عقاله في حديد البرنده، وغترته رافعها، عاد راسه زين واسود شعره ماشالله فعاديبي ينسبح شوي لأن الشمس في وقت الشتاء تكون لذيله وجبر المراكا وحط رجليله عليه وقال لها وين بتروحين؟ قالت: عاد ابروح، قال: لا اقعدي هنا شوي، اقربي وش عندكم اليوم من الحكي. قالت: ابد والله زهمت علينا اختك فلانه وانها تعزمننا وتقول مبطين ماجيتونا ولا سيرتوا. قال: ايه ان شالله اخر الاسبوع نبي نجمهم جميع وناخذ استراحة والا طلعنا بهم للبر، قالت: زين وزهمت مرة جيرانا تسأل تقول: شغالتكم من وين جبتوها عن طريق أي مكتب؟ وقلت لها والله مدري وتعلمه باللي اتصلوا اليوم، قال: زين تراي ابنسبح شوي ربع ساعه غفوة واقربي شوي وهي تقرب ويحط راسه على فخذها وقامت تفلفل في راسه باصابعها وماشالله رقبته جبره مصتصح ومتعافي، المهم انها وهي تقلّب في خصايل شعر راسه والشمس ساطعة على راسه ولا والله يوم لمحت هاك البياض من شعر راسه وهو توه صغير وتلمح البياض منا وتلمح بياض منا! قالت: يافلان كن الشيب غزاك مبكر، اشوفه هذا هو بيرق، قال لا والله قالت: الا جاك هذا هو غازيك تولم:

فتمثّل في ابيات ماعلّم بها الاعقب ما طاف فترة وسنّع الابيات على موجب
هاجلسة:

قالت جواهر لي وانا كنت سرحان
اشوف برق الشيب شعشع وناضي

قام وغزاك وصار يجمع له اعوان
واحتل منك الراس دون اعتراض

وانته صغير السن بالعقل رجحان
وسيفك على كل المعادين ماضي

وهذا عدو لك وتعطيه الامان
كنك بغزو الشيب للراس راضي

قلت البياض يزيدني بر واحسان
يعطي وقار وحكمة وانتهاضي

قالت وقارك ثابت طول الازمان
ماحتاج في قدرك الى حكم قاضي

قلت البياض يخلي الرجل له شان
قالت ترى اللي قلت ذا هرج فاضي

قلت النبي لاشافت الشيب تنسان
وتمحل عقب فرقه ذيك الفياضي

قالت بعد ماضمتن وسط الاحضان
الله يكثر في شعرك البياضي

(ضمتن) بلهجته لأنه هو من اهل بريده، قالت الله يكثر في شعرك البياضي
لأنها عرفت ان الشيب يطرده عنه البنات.

وهالشاعر اسمه محمد السليمان الضالع من اهل بريده. وسلامتكم.

وأذكر بعد بيت للشاعر فهد بن عبد العزيز الفايز من أهل الفرعة من النواصر
من تميم يقول كنت مرة أحلق بأخر شبابي واطالع وجهي بالمنظرة وقد مسحت
معجون الحلاقة وفيه بياض بسيط اشوفه وانا اقوم وامسحه زود بيدي وعيا يروح
ويقول البيت التالي ولا ادري وش باقي القصيدة يقول فهد :

لاح البياض بعارضي قلت صابون
واثره بياض الشيب يرعى السوادي

ويقول الشاعر فهد الفايز أيضا بقصيدة ثانية يوم بداه الكبير يقول :

لا والله الا تعدتنا سنين الشباب
وجتنا على هونها تمشي سنين المشيب

سنين مرت علينا مثل مر السحاب
وأخذت ما كتب لي في هالعمر من نصيب

يوم ان شمس العمر من فوق روس الهضاب
واليوم انا اشوف شمسي حدرت للمغيب

وان كان تنشد عن المعنى فهالك الجواب
انشد معجب ولا تنصى عيادة طيب

الشيب مقدور تغييره بلون الخضاب
مير البلا ما حد غير قضيب بقضيب

واذكر بعد ابيات مثل هذي بس الرجال اللي قالها شايب بعكس اللي قبل .
شايب كبير والى جا والاه يخاف من مرته او انها مروعته ، لكن يقول في الابيات :

لاضاق صدري نحرت انثاي
 ربيع قلبي مشاهدا
 لاجيتها صلحت لي شاي
 ولي مرقد جنب مرقدا
 تمشي على غايتي ورضاي
 لعلني يوم مافقدا
 وان شفتها صممت بالراي
 ياعنك ماني معاندا
 اخاف كف على علباي
 لاناوشتني قفا يدا

فبعضهم مطيع ويخاف انها تهاوشه والا تقول شي مثل هالشاعر، فالحقيقه الكبار دايا يحصل بينهم طرايف مثل هالنوع، اذكر سالفه صغيره مثل النكته، يقولون فيه رجال متزوج له حرمه، وام عياله كبيرة ويقدرها ويعطيها الشي الكثير من الاحترام والتقدير ولايقول لها شي، قام وتزوج له بنت صغيرة والبنت هذي بعد صايرة لبقة وحبيبه ونازلين سوا في بيت واحد وهالبنت عادة نفسها بنت للزوجه الاولى، اذا امرتها قالت لها ان شالله ياخالتي وابشري في السمع والطاعة ولو انها زوجته، جا يوم من الايام والاهم قاعدين على جال الوجار في الشتاء شاين ضو والحرمة الاولى قاعدة ولها وقارها بس عينها له تناظره هو ينظر البنت والا لا والى منه ناظر حرمة التالیه زعلت وتكدر خاطرها ولو انها ماحكت ودها تهوش، وبالصدفه تمر هكالخنفسه الله يكرمكم من وری الدلال

وياخذ الملقاط ويقضبها وقال للبنت : تعالي يابنت خذيها واجدعيها برا ، محشم
الكبيرة عن القومه بس انها زعلت وقالت : اييه تعرف من تهدي وتعطي . .
قال : وش انا معطي ! معطيها طقم الماس ؟ معطيها خنفسه تجدعها ، قالت ولو .
وتدور أي سبب يحرضها على الهوش . وهذي من الغيرة اللي تصير بين
الزوجات الجارات .

لكن يجب على الحرمة العاقلة اذا صارت كبيرة في السن وزوجها خذ عليها
حرمة ثانية ازين له واستر وان كان انك ماتيينها عندك في بيتك يحطها في بيت
لخالها وكلن رزقه بياخذه ، انتي رزقك بتاخدينه انتي وعيالك واللي غيرك بياخذ
رزقه ويجب على الحرمة تعالج نفسها بالصبر والقران والاتكال على الله وتروح
عند عيالها وماتخلي ابليس يلعب عليها بالهواجيس والافكار ويجيها الضغط
والسكر بسبة ضيقة الصدر ، الرجال معه علمه يبي يعرس سواء أخذ ثنتين والا
ثلاث والا اربع . . الله سبحانه وتعالى محلل له ذلك والله الموفق .



يا ناس خلوا كل واد ومجراه

جرت أحداث هذي القصة على الشاعر المعروف عبدالله بن حمود بن سبيل من أهل نفي من قبيلة باهلة، شاعر غزل رقيق ويصف البادية ونزولهم وروحهم هذا الشاعر توفي رحمة الله عليه عام ١٣٥٧ هـ، والسالفة اللي ابذكرها من أحد أحفاده فيقول اللي قال لي السالفة .

في سنة من السنين وقت ما كان بن سبيل أمير نفي في عالية نجد وفي نفس الوقت كبير العائلة فحصل يوم من الأيام مشاجرة عادية في مزرعتهم بين أحد العيال يمكن من أحفاد بن سبيل لأن عيال بن سبيل ثلاثة أكبرهم سعد ويجي عقبه عبدالعزيز وعقبه ناصر متزوج حرمتين وقتها، يمكن أحد عيال سعد أو يكون جده بن سبيل من ناحية الأم المهم جذعان واحد أكبر من الثاني تهاوشوا في النخل يقول قام واحد منهم ويومي بالمسحاة يبي يرمي بها الثاني ويمكن يوم أنه يرمي بالمسحاة على باله الى وصلته ييصد عنها والا يبعد عنها وما حصل هالشيء المسحاة انطلقت ودلت في الهواء تدور تدور تلف وتطقه على راسه فطاح الولد ونزف دمه ومات (قدر الله وما شاء فعل) وتصير مشكلة ومصيبة .

الولد هذا اللي رمى المسحاة ارتاع المسكين ولا تصور أنها بتاصل الى هالحد وركب ساقه ونحاش من نفي الى الشُعراء اللي تبعد مسافة الذلول يوم كامل تقريبا، وتلوذ هناك ويتصدد في الجبال وبين النخيل ويغاب عن أهله حول السنة، ويوم درى بن سبيل وينجن ويغضب على هالولد اللي فيه ما فيه السفية ويحلف بالطلاق من حرمة الغالية من حريمه يا أن شافته عيني لاقتله، ويدلون

يهادونه الجماعة قعد فترة وضاق صدره عقب الحادثة وبدى يضعف جسمه وكثرة هواجيسه، وفيه كثير من قرايبه الكبار اللي يجلسون معه في المجلس يعذلون عليه ويقولون يا أبو سعد ما يصير تحلف اليمين أنك تقتله غير اللي مات تبي تموت واحد ثاني . . ! إلا خله واسمح له والحرمة بدالها حرمة ثانية وماش ما طاع ابد ويقعدون مدة يعذلون عليه إلين الله جاء واحد له كلمة مؤثرة و كلامه له معنى ومؤثر وقال يا ابن الحلال تعوذ من الشيطان وأنت الحين راحت حياتك هواجيس وأفكار علشان هالولد والولد مهوب قصده الشيء هذا ومهيب نيته يقتله لكن هذا اللي صار انذبح واحد وتبي تذبح الثاني بعد، وبالله وافق بن سبيل وقال خلوه يجي الولد سمحت له .

وجا الولد يوم درأى أن جده سمح له بعد فترة طويلة حول السنة، وعاد بن سبيل قد طلق المرة على حلفه، ويوم طلق المرة وجا عقب فترة ويضيق صدره بالحيل على المرة لأنه يغليها مرة ومالها ذنب المسكينة تحسف بها، عاد جماعته يحاولون أنهم يهدون من روعه ويعذربون المرة في نظره حتى أنها ترخص في عينه وينساها، عاد واحد منهم وهو قاعد عنده ويقول له يا ابو سعد يا رجال اشوا انك طلقته الحمد لله اللي الله فكك منها دقاقة عصلا عراقيبها صفر ويرد عليه بن سبيل أدري أنها دقاقة ولا أبي إلا هي ليتها تحصل ويحاول مرة ثانية ويقول دقاقة عصلا تروع لو تناديك في عاير ارتعت قال ولو ما ابي الا هي، وقالوا له قضن الحريم!! ندور ونخطب لك غيرها قال لو تحببون ايش ما تحببون ما ابي الا هي، قالوا الحين هي مهيب من أقاربك بعيدة من أقصى الناس قال أدري انها من أقصى الناس أبيها ولو، قالوا تراها بعض المرات تروح للجيران ولا هي تشاورك بس قصدهم يعذربونها ويشينونها بخاطره

والا هي والحمد لله شريفة عفيفة مطيعة ما تطلع من داره قال ابد ما عمرها راحت ولا تعدت إلا هي مشاورتني ، قالوا أنها مريضة وعليّة قال ابد ما اخبر فيها الا العافية ، فكل ما حاولوا يعذبونها وهو يعيي ما يبّي إلا هي مصمم على رايه لأنه ضعف عقبا فعلاً عقب ما فقدها قال القصيدة هذي :

ياالله ياللي تسجد الناس لرضاه
يا وامرٍ خلقه على حج بيته
تفرج لمن سده على الناس ما ابداه
راضي على مقسومك اللي عطيته
من شي يسل الحال والجسم يبراه
والناس ما يشفونه ان ما شفيته
قلت آه واجرحاه من خلتي آه
وان حملوني حمل غي قوته
قالوا سفا بالحال ويش اللي اغواه
قلت آه ويش المنكر اللي وطيته
قالوا جهلت وبان علمك لمتهاه
قلت آه علمي يا ملا ما كميته
قالوا طلبنا لك من الله معافاه
قلت آه وحدته وعفوه رجيته
قالوا اهله واحباب عينه نصحنه
قلت آه هذا وارد ما بغيته

قالوا ندور لك من البيض حلياه
قلت آه لو غيره بكفي رميته
قالوا نشاش الحال وش لك بلاماه
قلت آه عود الموز بيدي لويته
قالوا تزوج كود تدله وتنساه
قلت آه لو خذت اربع ما نسيته
قالوا من اقصى الناس وين انت واياه
قلت آه ما آنسى يوم جاني وجيته
قالوا نشوفه عند هذا وهذا
قلت آه ماعمره عقب حجر بيته
قالوا عليل ناقل داه برداه
قلت آه باقراي وروحي فديته
قالوا نشير ولا نفع ما حكيناه
قلت آه هراج النمايم عصيته
قالوا كثر شيبك وقلبك بعمياه
قلت آه لو قلبي غرير نهيته
مطاوع قلبي بعجفاه وقده
والى عطى منهاج درب عطيته
ياناس خلوا كل وادي ومجراه
قلتوا كثير وقولكم ما لقيته

هذي القصيدة اللي قالها بن سبيل وهو صادق ، الله سبحانه وتعالى يقول
 " بل الانسان على نفسه بصيرة " فنصايحهم كلها ما دخلت مخه وعيا يوافق على
 كلامهم فيقول مطاوع قلبي يعني ابخص بنفسي ، والبيت الاخير اصبح مضرب
 مثل في المواقف اللي مثل هذي مثل الى جا واحد يشير على واحد وهو ما هوب
 مطيع قال يا ناس قلتوا كثير وقولكم ما لقيته .

والخلو في القصيدة مطلعها ، دايم الاولين في الشعر الى بغوا يبدون في
 قصيدة يبدونها بتمجيد الله وبذكره ويختمونها دايم بختمة طيبة بالصلاة على
 النبي وتصير القصيدة متماسكة مثل هالقصيدة هذي لو يفرط منها بيت باين محله
 هذا اللي خلى القصيدة تصير خالده .

وإلى لقاء آخر .



...

حسن الوفا

جرت هذي القصة على الشاعر حاضر بن حضير العازمي هذا الشاعر كان في آخر حياته كفيف البصر هذا اللي أنا سمعت عنه، وكانوا أهلة رحل يشدون ويتزلون وسكنوا في حوطة سدير وقبل لا تحجي السيارات كانوا يجون للمدن الكبيرة على رجليهم وقليل اللي يجي على دابة، وهالشاعر كان رجال فقير وضعيف الحال وعادة الناس اللي يجون إلى المدن الكبيرة يروحون يسلمون على الشيوخ ويقصدونهم وخاصة الشعراء يجون للأمراء ويسلمون عليهم ويكرمونهاهم ويشرهنونهاهم ويعطونهاهم، فهو يوم جا ودخل القصر كان وقتها الملك سعود ولي العهد وحاول أنه يدخل مع اللي يجون يسلمون على الملك سعود وما حصل له وقعد عند الباب، وهو رث الهيثة ومسكين وضعيف وقليل شوف والأجنبي دائما مكسور الجناح مهوب كل يتلقاه خاصة إن كان رث الهيثة ومهوب معروف، وجا هو مع الناس اللي يسلمون ولا حصل له أول يوم ولا ثاني يوم ولا الثالث وعجز ويالله عقب عشرة أيام حصل له يدخل ويوم دخل كان هو جايب قصيدة بيلقيها على الشيوخ فلكن قال قصيدة عند الباب ويوم مثل قدام الملك وسلم قال وش عندك قال عندي أبيات قايلها وقال:

عنيت لك من باطن سدير يا سعود

ودي بقربك يا ربيع الضعافي

بالليث يا الضرغام يا منقع الجود

يا مهدي اصعاب العرب بالعسافي

لا جيت يمنعني عن الباب راصود
والصدر ضاق ولا على الله خافي
لعل حظي فيك ماهوب مقروود
واللي عطاك من الوهايب جزافي
تعطي جواد الخيل بارسانها قود
زود على العيرات حم الشعافي
يا ابو فهد ما لي بغير انت مقصود
يوم انهن عضن في الضلافي
ارخص لي اواجه من القل مضهود
رجلي ما يضي عليهن لحافي

واكرموه من ضمن اللي هم يشرونهم وعطوه حقه اللي الله كتب له وقعد
في الرياض فترة يروح هنا وهناك ويسير على فلان ويتقهوى عند الاسر والحمائل
يوم انه مضى عليه فترة وهو قاعد يمكن حول الشهرين والقريشات معه رابطها
وحاطها في مخباته وما ينام إلا وهو متوسدها ويتلمسها، من يحصل أول
الخرجية، ووده يرسل من الهاخرجية صوغة لأهله وما كان فيه سيارات يالله عقب
١٥ يوم أو ٢٠ يوم تروح سيارة جهة الجمعة، الحاصل وهو في السوق والا فيه
واحد من خيرة الرجال وطيب وكريم اسمه محمد بن صالح من الاسر المعروفة
في مدينة عشيرة في سدير كان بن صالح مستأجر لوري ويشيل ركاب يترزق الله
فيها، والسيارة هذي بتمشي بkra او بعده لوري أحمر والناس يجمعون عفشهم
اللي معه شنطة واللي معه شنطة وفراش واللي معه برميل فيه قاز والثاني معه باب

خشب واللي معه شبك ومكينة خياطة مشكلين الناس ، أما حاضر دخل السوق بوسط الديرة يسمونه سوق الحساوية اسفله ناس يخيطنون ثياب وجنوبية يبيعون قهوة وهيل واغراض ويجي هو يتلمس ويتحسس ويقعد عند راعي دكان ويشترى منه واول ما فيه كيس تحط فيه الاغراض بس الحريم يجمعون من الثياب المستعملة ويقصصونها ويصلحونها كيس ويبيعونها على اللي يبيعون القهوة والهيل والدارسين فجأ حاضر عند راعي الدكان وقال ابي قياسة سكر يجي لها ١٠ كيلو وقال ابي نص وزنة هيل ما بعد جت الكيلوات ويحط له هيل وقال ابي لومي ويحطها له في كيسة من هالخرق وياخذ شوي دارسين وزنجبيل وفناجيل من ذيك الملونة وبيالات المهم تقضى واخذ له اغراض واجد وشافها والى والده واجدة ولقى واحد يبيع كنادر رامي صندوق خشب ما يبيه واخذ اغراضه وحطها في هالصندوق واخذ حصاة وسمر عليها وقال خلها عندك الى بغى بن صالح يمشي ابروحوه معه قال زين .

وفعلأ يوم جا بيمشي بن صالح قال له الله لا يهينك هالصندوق ابيك تجدعه لأهلي إلى وصلت أهله يدري عنهم ساكنين حولهم ، ويوم انه حط الصندوق في اسفل السيارة وركبوا الركاب وتجمعوا اللي على السلة واللي في الصندوق واقفين اللي متلطم واللي يحكي مع خوية ودايم الغمارة يحجزونها للمعاريض أو اللي يبي والدته يحجز الغمارة اللي قدام المهم أخذوا صندوقه ومشوا ويوم وصلوا الديرة بعد يومين أو ثلاثة أيام لأنهم يواجهم تغريز وحفر ودفن وأحياناً ينزلون العفش علشان يدفون السيارة يغتثون مرة هالكلام قبل لا تنزف الخبوط فيوم وصلوا للديرة وبغوا ينزلون الصندوق ما لقوه تخالفت فيه يدين وضاع .

فضاع صندوق حاضر ولا يدري وين راح ويوم جا عقب شهر ورجع حاضر
 لأهله وسلم عليهم على باله أنهم مسفهلين ومستانين واصلتهم المقاضي
 والأغراض ويسألهم عن أخبارهم وأحوالهم ويقولون الحمد لله بخير بس ما
 روحنا لنا شيء في روحنا، قال وشو...! استغرب حاضر قال روحنا لكم
 صندوق فيه أغراض فيه هيل وقهوة وزنجبيل ودارسين وكسوه لكم وين راحت
 قالوا ابد ما وصلنا شيء قال ارسلتها مع بن صالح قالوا ابد ما جانا منه شيء،
 وراح حاضر لبن صالح في مزرعته وسلم عليه ويسأله قال يا ابو محمد
 الصندوق اللي روحته معك ما وصل لأهلي قال دور تأكيد يمكن واحد من
 الركاب نزل ولا يدري من هو له، فدور على الصندوق وما لقاه ورجع لبن
 صالح ويقول الأبيات هذي :

يا خوي انا اخترتك على كل مخلوق
 وارسلت معك من المقاضي علاقة
 بلاك خير واجودي وماثوق
 وشرواك مع حملة يشيل الوساقة
 يا ابو محمد يا هوى لابس الطوق
 ما هوب حق اشناك عقب الصداقة
 عندك غدالي يا ابن الاجواد صندوق
 وانا حشا ما الحقك تهمة سراقاة
 لكن تبلس واظهر الطاق مطبوق
 وان اعتقل ما الحقك راعيه ساقاة

والا اغرمه لي يا ابن صالح من السوق
 موجب من العازة ولا ش أنفهاقة
 الى قلطت بحق مانيب مفهوق
 حقي هو القادم وادور لحاقه
 على المناصي لي معاليم وحقوق
 وجيش ومخاريج وكساوي رقاقة
 وارد على الأخيار مع كل طاروق
 واقلط بدم الوجه قبل اندفاقة
 الكذب نفع صباح همج ومطروق
 والصدق قرهود قراح مذاقه

القي هالقصيد على بن صالح وقال يا حاضر والله يا ابن الحلال مأدري وين
 صندوقك وحنالو محناب محل ثقة ما روجت معنا صندوقك من الأساس قال
 حاضر اي بالله محل ثقة إلى الحين لكن تخبر أنا رجال ضعيف وهذا محصولي وأبيه
 لأهلي قال بن صالح والله ما لقيناه بس يا حاضر صندوقك كم تقدر قيمة اللي فيه
 قال مهوب غالي من الميتين وفيها وإلى ذاك الوقت يوم يجيهم وقت صرام التمر وكان
 عند بن صالح نخل يسمى المظل وكان في النخل اخو بن صالح ويقوم يكتب لأخوه
 ناصر أنه ياصلكم حاضر تعطونه ثلاثمية وزنة تمر بدال صندوقة ياكل منها ويبيع اللي
 يبي وعطاه الورقة تشكر منه حاضر والحقيقة هذي العادات الطيبة ، وهذا هو
 الشاعر ثبت كرم أسرة بن صالح بالقصيدة هذي اللي ذكرها . وإلى لقاء .



من ضحايا الغرام

سمعت هذه القصة من الشيخ منديل الفهيد رحمه الله، ويذكر في القصة أنها جرت على واحد اسمه مسلم الوليعي من جهينة يقول أن مسلم كان يرعى الببل في جهة بلدان عنزة في الشمال وطول ما هو راعي عند معازيبه مرتاح منهم ومرتاحين منه واثناء جلوسه عندهم شغله في الرعي كنه جازت له وحدة من البنات وكنه حس منها ودّله ومحبة ويتلاقون كل يومين أو ثلاثة ويشوفها، هو مال قلبه لها وحبها وكنه حس منها بمحبة ودائما عفة الرجل العربي تبعده عن المحارم والعمل الردي مع النساء .

وطول فترة وعيشتهم عندهم يتلاقى مع هالبنات في المكان الفلاني يوم في الشعيب ويوم في المكان الفلاني وحاس منها بالود وبنات جميلة بالحيل بس ما بعد تأكد من حبها له وهل هي تبادل له نفس المشاعر فحب يتأكد منها وراح لمّ عجوز لها محل معروف تجلس فيه من هالعجز المحككات اللي تقل ريانة قد مر عليها من السوالف والعلوم إلى قبلّ، ودائم يقعد عندها ويروح لها ويتعير عليها وتتعير عليه المهم قال لها يا خالة انا والله ميت على فلانة واحبها وودي اعرف هي صدق تحبني وإلا لا . ؟ ، قالت إلى جا باكر علمتك عاد هي صايرة مثل العراف اللي معروض عليه قضية قعدت تدرسها من كافة الجوانب وقالت له من بكرة إلى جا يوم من الأيام وعودت للمراح طح وصح وإدّع أنك مقروص في رجلك وطح وتألّم وبين أنك متألّم ومقروص وتشوف من اللي ييفزع معك منهم، وفعلأً يوم جا ليلة من الليالي ويطيح ذيك الطيحة اللي كنه طايح من

حادث ويقعد يتألم ويتلوى قدام ربعه ويصيح واللي في الفريق يصايحون
 مقروص مقروص مع اصبعه من يبي يمص السم ويطلع - من أول الى قرص
 أحد يجي واحد عصامي ويتبرع ويمص السم ويتفله لأن فيه خطورة -
 يصايحون من يمص السم ومحد تقدم يشوفونه ويتألمون لأله بس ما احد حاول
 يمص السم، شوي ولاهذي البنت سمعت بالخبر وجت متأله بالخليل وش فيه
 قالوا مقروص ولازم واحد يمص السم وناظرت وما لقت واحد يمصه فقالت أنا
 أمص السم وهو يصيح ويشوفها وهي تصيح ودمعوها تهل من عيونها وتجي
 البنت تجلس عند رجله ولمست ساقه، وقرت عليه بصوت خافت ومن يوم هي
 يوم لمست ساقه وهو باديته العافية .

المهم من خلال الموقف هذا عرف أنها فعلاً توده وتحبه عاجوه ذيك الليلة
 ومعروف اللي يعالج أول كبار السن والعجايز عطوه سعوط وبخروه، ويمكن هو
 بعد طاق اصبعه بحصاة مخليها تارم ونام على باقي أله علشان ما يبين
 وينكشف، وعقب يومين وهو متعافي ويلاقها في المقلى ويقول لها تراني اودك
 وأحبك وأنا والله ودي اتقدم واخطبك وسكتت البنت ويجي عقب يومين
 ويلاقها بعد في مكان ثاني قريب من مكانهم ويهرج عليها مثل الهرج
 الاول، وإلى لها البنت أخت صغيرة تسمع الكلام من بعيد وهو يقول لها أي
 ودي اخطبك وتقول ما يخالف بس عيال عمي مهمب مطيعين ومهمب مخليني
 وحتى لو عرضوا علي ما أبي إلا أنت ما أبي غيرك أحد والبنت الصغيرة سمعت
 هالكلام ونقلته كنها فاكس وعلمت أبوها - ويقول المثل خذ علوم القوم من
 سفهاها - .

فقالت له أن أختي قعدت معه وأناي اسمعهم يقولون كذا وكذا فعاد اضطرب أبوها ودار حكي بين أبوها واخوانها وكن البنت حست بعدين أنهم ناوين لهم نية مهيب زينة أما ضرب أو قتل وإلا غيرها، وراحت وعلمته أنهم كذا وكذا وهو ياخذ ذيك الذلول ويروح عليها في ليلتها ويرجع لدياره الأصلية يجلس عند أخوه ماله إلا هالأخو اللي أكبر منه بس ويسكن عنده في جهة المدينة المنورة المهم جلس فترة عند أخوه وإلى والله كل ماله يضعف وتكثر هواجيسه ولا طاع يبي شغل ولا عيشه يا ما طلع من البيت وجلس يخطط في الأرض عند عاير ويهوجس وكل ماللهواجيس تكثر حتى عيونه متفرقة إلى جيت تناظره ما تدري وين بيروح معه من التفكير، ومعروف الهواجيس تلعب في الواحد لعب ومثل ما قال بن لعبون:

لا دك به هاجوس ما يسمع الطوب

واليا انتبه ماجابت الورق جابه

الحاصل أن الرجال بدا يضعف مثل المريض وإلى هو مربى جدایل جميلة عليه، المهم شافه أخوه أنه مريض ولا عرف علتة ولا يدري وش فيه ويقولون له ناس لا ينهبل أخوك وإلا يجيه شيء شف وش علتة أو مصيبتة، ويوديه لم عجوز تعالجه وتحاول فيه تعرف وش علتة تطالعه وتشوفه والولد ما علمهم بشيء ولا بين لهم حاجة، ويوم بغوا يطلعون تحي العجوز تنادي أخوه وتقول له أنا ما أدري وش فيه يمكن أنه عاشق وإلا فيه شيء بس وده أنت لم جبل رضوى رح أنت وایاه اكشتوا وقله نبي نروح نقنص وخله يرقى الجبل وإلى طقه الهواء يبي يبين منه علم، المهم جا بعد كم يوم وقال له يا أخوي ودنا نروح نقنص ونصيد أنا

وايك ونوسع الصدر وياخذ على الذلول ويروحون لم جبل رضوى ويوم
وصلوا جلسوا فيه وشبوا الضو ويصلح القهوة وصاد له طير وشواه له المهم قعد
الولد على حصاة والى رجليه تومي متدليه وإلى رضوى هذي مكان رفيع
ويشوف مسافة تحته مد نظره ، وقال له اخوه اقعد خل الهواء والبراد يطلقك وتراني انا
منيب بعيد عنك ابروح اتصيد وراح اخوه يتصيد لكن باله معه ويشوفه من مكان ما
يدري عنه : وبعد شوي بدا مسلم يغني بصوت جميل لأنه يشوف المنظر اللي تحته
من بعيد في شجرة طلحة كبيره وبعيده وتحتها خضار وموقع مثل اللي كان يقابل
فيه البنت اللي هو عشق فقال هذه الأبيات .

يقول الوليعي والوليعي مسلم
من دامت أيام الصبا له دام
لو إن عجبات الصبا يجبرنه
كما يجبر الجابر كسير عظام
ليال الهوى مثل الربيع الى زها
وش حيلتي ما للربيع مقام
قار قراني يوم قرصت بهامي
غرو صغير ماعليه لثام
قراني وهو يسفح من الدمع ناظره
ليته قراني والعيون نيام
الى قرى عليّ وارخا لثامه
قلبي تزايد علة وهيام

رقيت في رضوى ورضوى منيفه
واخيل في عيني جنوب وشام
واخيل بعيني طلحة^(١) ناعمية
سلام يادار الحبيب سلام
أنا جيتكم من راس رضوى عشيّه
كما شن غرب باد منه وذام

يوم سمعه اخوه يقول كذا عرف أنه بيطيح ويجي يركض ويحاول يمسه ولا مسك إلا عباته والولد طاح من الجبل وعرف أخوه أنه مات فقام وشال اغراضه ونزل تحت الجبل ويجي عند اخوه والى هذا اخوه ميت ويقوم يقصص جدائله ويروح ومعه العباة ويوم تم له يومين ثلاثة ويروح لم العرب اللي جا منهم اللي عندهم البنت ، ويوم وصل وينشد عنهم ولقاهاهم وعرفهم بوسم الابل وجايهم بصفة أنه كنه دوار ويدور على ذهيب والتفوا حوله الناس وإلاه قايم على جدائل أخوه وحاطهن على الشداد والعباة جنبهن وما يدري الاخو الا يوم انطلقت من بين البيوت بنية جميلة وتجي تقرب من عنده وتشوف الجدائل والعباة عرفت عبايته وجدائله وتسال وتقول له أسألك بمسير قدمك ومجري نسلك وعالم علمك راعي هالجدائل والعباة هو وينه ويقول ابد هذا تعاشق له مع بنت ولا حصلت له ويجي يوم ويعدي على راس رضوى ويطيح ويموت ولا ادركنا منه الا العباة وجدائله ويوم سمعت هالكلام وتشهق ذيك الشهقة وتطيح وتموت .

(١) طلحة: شجر الطلع الكبير.

طالعها اخوه قال اثره ما ينلام وخاف يعشق ويصير له مثل ما صار لاخوه وقال

بيتين هو :

والله فلا الوم الوليعي ولو طاح
من راس رضوى والعوض به عباته

مير افطنولي عند هبات الأرياح
لا اذب عمري ثم اسوي سواته

وبالختام : هذا والله أعلم وإلى لقاء آخر .



مغيب القمر

جرت هالسالفه على الشاعر المعروف سليمان بن شريم من بني زيد ويعتبر من أبرز الشعراء في الجزيرة العربية في الرد والنظم وتوفي عام ١٣٦٣ هـ، وطرق أغلب انواع الشعر في الوصف والحكمة والغزل العفيف والرثاء، فالسالفه هذي يقولون أنه توه متزوج في الوشم ولا أمداه يتهنى من العرس ويمضي فترة مع زوجته إلا ويجونه مجموعة من الأصدقاء كان هو يرقبهم من زمان أنهم يحذرون من نجد إلى الخليج لتجارة لأن من أول إلى بغوا يروحون كانوا يروحون مجموعة ما يقدر يسافر الواحد بروحه لما فيها من أخطار، فراح مع هالمجموعة من اللي يعزهم ووصلوا الكويت ومعروف الواحد ما يحس بلوعة الفراق عن أهلة والمكان اللي جاي منه إلا إلى قعد يوم يومين، وسليمان فعلاً قعد له شهر وهو لا يزال قلبه متعلق في ديرته اللي جا منها فمضى الشهر ومضى خمسة أشهر والرجال ماش ما تنام عينه يهوجس بالمكان اللي جاء منه وطلع في الليل في وقت قمرا وطبيعي اللي في بيت ومع ناس وهم عزابية ونايمين وتجزى عينه من النوم يطلع في الشارع أو يطلع للسوق يتنفه أو يمشي في البر لحاله يرفه عن نفسه شوي ويحكى على نفسه والأولين إلى شافوا واحد قاعد مثل كذا قالوا له هاه يا فلان وراك مصومع لحالك المهم طلع ذيك الليلة وإلى الهوى جاي من جهة الشرق من يم نجد وقام وتمثل بالأبيات هذي يقول:

يا الله يا مجر القمر من مغيبه

يامرجعه للشرق من عقب تغريب

تفرج لعين من وجعها مريبه

عيا يفيد بها الدوا والتطاييب

هذا لها خامس شهر مستصيبه
بين الرجا واليأس والخبث والطيب
على الذي من دونه أرض تعيبه
ماياصلنه متعبات المناجيب
ليت الهبوب اللي تجيني تجيبه
لا شرقت من نجد من غير تجيب
لين أني أقضب مقدمه والتوي به
عقب التفرق والبطا والتغاريب
يقرا المضموني وأنا أقرأ لغيبه
سراير تكشف بلياً مكاتيب
اللي علي فراق شوفه صعيبه
نهار قفينا على الفطر الشيب
المترف اللي ما يمتاع صويبه
جربت منه وكل شي بتجريب
أدعج غنج كنه عيون الريبه
شيهانة تفرس بكل المخاليب
والراس ذيل اللي يشعشع سبيبه
يسبق إذا جن السبايا جناديب

والخد قنديل الدجا ينسري به
عليه من شغل النصارى كواليب
عوده كما البردي ليان رطيبه
تومي به النسناس بين النباتيب
وملامس ما نشت منها لبيبه
ألين من الديباج دمث المقاضيب
ريحه كما ريح النفل في شعيبه
في وادي عله من الوبل تشعيب
مطور أمس ومسي ما وطيبه
واليوم شمس وفاح طيب على طيب
لواهني الذيب يرفع قنيبه
وأنا قنيبي بالخفا شقت الحبيب
ما والله أصخي به وأنا خاطري به
لو غترت سود العوارض من الشيب
يا أهل الهوى سود الليالي ضعيبه
يا ما سعن بفراقهم عقب تقريب
خط بسجلي ما لغيري قري به
عطف بلطف واجتماع وترحيب
صلوا على سيد البرايا طيبه
ما افتر دولا ب الهوى بالدواليب

هذي قصيدة سليمان بن شريم واللي اشتهرت وعرفت عند أهل الشعر الشعبي يمكن لأن ما احد سبقه في المعنى يوم يقول ريحه كما ريح النفل في شعبيه، وله قصايد كثيرة منها القصيدة اللي قالها بعد فترة يوم كبر وحاول أنه يتقدم لخطبة مرة مخليها زوجها وجا يبيها من اخوانها واثنين من اخوانها وافقوا وواحد عيا وكل ما جا سيّر عليهم في نخلهم والا مار يسمع صوت البنت تون تتعب من الشغل وتدري هي انه جاي يخطبها ويبيها وودها ان اخوانها يوافقون فقال هالقصيدة هذي:

يا ونتاه اللي برت جسم حالي
بري الدبا نبنوب غصن تفشلاه
على وليف بالموده صفالي
ازريت انوش حماه وانا اثمناه
غرو جبينه مثل خط الهلالي
سبحان رب صوره لين سواه
وحياة رب كمله بالجمالي
من مفرق الهامة الى حد ماطاه
انه منول وامس واليوم غالي
واتلى زمانه بالغلا مثل مبداه
ماله وزين الامودة عيالي
اصفر عيالي بالغلا كنه اياه

لابطيت ما شفته وهو ما عنا لي
عفت المكان اللي يغيبه ويجفاه

هبي بريحه يا هبوب الشمالي
كود الجنوب ومطلع الشمس تنصاه

هذا من قصيد سليمان بن شريم رحمة الله عليه ومن قصيد الغزل الرقيق،
اللي إلى الحين باقي ومحفوظ من قوته واللي عليه الكلام اللي تمضي السنين وهو
ما يسمل دايماً متجدد واضح المعنى وقوي، ولذا صار هو القاعدة الشعرية وإلا
كيف وصلت اخبارهم واشتهروا وصاروا معروفين مثل بن شريم وبن سبيل
والقاضي وبن ربيعة ومحسن الهزاني وفيه غيرهم في الخليج فيه في الاحساء/
محمد بن مسلم سليم بن عبدالحكي والمغلوث ومن أهل قطر المعروفين الشاعر
محمد بن عبد الوهاب الفيحاني مثل هالشعراء البارزين اللي انتشر قصيدهم
وتناقلوه الرواة.

هذا وبالله التوفيق.



حرص الآباء على الأبناء

في هالقصة نبي نتحدث عن الأبناء ، والأبناء شأنهم عظيم وخاصة في مثل هالأيام ، يجب على الرجل العاقل اللي عنده عيال أنه يحرص عليهم وخاصة الولد الكبير لأن غالباً إذا صلح الولد الكبير اقتبس منه الولد اللي اصغر منه وصار يقتدي به ويقلده ويصير إن شاء الله مثله ودائماً تخبرون الاولين عندهم دعوة دايماً يرددونها في المجالس الى منهم شافوا الولد هب ريح وتبدو عليه المرحلة قالوا يالله اصلحه يالله جعله اطيب من ابوه يدعون له ، لأن الولد الى صار صالح استمرار صلاحه من صلاح ابوه الأبوالى صاروا عياله صالحين وش يبي احسن من هذا ، والعيال الصالحين او الولد الصالح نعمة فيه حديث ان ابن آدم اذا مات انقطع عمله الا من ثلاث علم نافع يتتفع به او صدقة جارية او ولد صالح يدعو له صلاح الآباء يدرك الأبناء .

له ، فدائماً الولد الصالح يحبونه الناس ويضربون به المثل وفي مثل هالايام يا اخواني كثير من الناس وخاصة بعض الاسر رجالهم يطلع ياخذ سيارته ويروح مع ربه يمين ويسار ويترك عياله وانا خابر هاك الحين يوم انا صغيرين اذا جا الرجال للعزيمة والى هذولا عياله معه حتى الصغير مره يلبسونه غترة وعقال ويعلمونه المرحلة ويخلونه يروح معهم ويتعلم الصغير من اللي اكبر منه لان الحقيقة فيه اداب وفيه شيء يجب على الآباء انهم يربون عيالهم عليها لان مهوب كل شيء يدرسونه في المدارس ويتعلمونه فيها ، فيه آداب وسلوك وعادات تكتسب من الخبرة والمران في المجلس مع الرجال الى بغى يروح واخذ عياله معه

اول شيء يعودهم الولد الجذع اللي عمره من اربعطش سنة وخمسطعش عيب انه يروح يرتز في راس المجلس في مكان الشيبان الكبار لا ما يصير مهوب محله، محله يصير في طرف المجلس ويصير صامت وساكت ولا يحكي، لين يسأل .

الرجال اللي جاي معزوم هو وعياله وجوا قلطو وسلموا العيال سلام مصافح بعض العيال الصغار الى شاف رجال طويل تعلق في رقبتة وحاس شماغه وبهذله، سلم سلام مصافح واقعد في طرف المجلس ويتعلمون كيف ياخذ الفنجان وكيف ياخذ البيالة يتابع البيالات اللي في المجلس ما يخلي البيالة على جنب ويحب راس الشايب ويتحفى به يعني اشياء تكتسب من خلال المجالس مهوب مع الأسف الحين الله يهدينا واياهم بعض هالشباب اعتب عليهم الى بغوا يروحون للعروس والعزائم يلبس كبوس هذا مهوب لبس الزي العربي اللي الله اكرمك فيه وحتى يبين لك هيبه ووقار، ولا يكثر البربرة والكلام مع اللي جنبه يقعد ويصير عينه على ابوه متى ما قام ابوهم يمشون معه يتقدم ابوهم للسيارة يفتحون الباب لابوهم واخذوا البشت من ابوهم هذولا العيال الصالحين، والا جو عند ابوهم رجال ما يروحون يمين ويسار ويلوذون عنه الى صار عند ابوهم رجال ضيف جو وجابوا القهوة والقدوع وصبوا وصار واحد في طرف المجلس الى قال له ابوه جب المدخنه وأنا أبوك جابها هذي من الاشياء تكتسب من المجالس .

صحيح انها مهيب تدرس لكن تكتسب كذلك في المسجد الى بغيتوا تروحون تصلون الله يقول خذوا زينتكم عند كل مسجد وعند كل صلاة، فإذا بغيت تروح تصلي البس ثوب زين وتكشخ واحضر الصلاة من أولها علشان الله سبحانه وتعالى يوفقك في الدراسة بكرة الى شافوك في هالسلوك الطيب الجيران

والاقرباء اقتدوا بك وقالوا ما شاء الله على ولد فلان الله من العقل الله من
المرجلة هذا اللي بيونه الناس هذا اللي يفتخر به أبوه حتى اذا صار بهالسلوك هذا
شرط ان ابوك مهوب قايل لك لا اللي تبيه يبي يحصل بس هاه التوسعه والروحه
يمين ويسار ومع أصدقاء السوء وإلا الى بغى يروح ما يشاوره وش يضرك الى
بغيت تروح تقول يا أبوي ترا اباصل صديقي في المكان الفلاني وتراني ابرجع في
الساعة الفلانية والى تأخرت اكلم اذا وصلت اخلي اهلي يطمشون أما انه يروح
كل الليل ما يدرون وين هو فيه . . ! هذه مشكلة .

ابوك وامك يرجفون الين تحجي هذي الحقيقة من القلب نصيحة لأبناءنا وإن
شاء الله أنهم منتصحين لكن هذي من شيء في القلب ومن محبتي لهم أنهم إن
شاء الله يطلعون عيال صالحين وفيه واحد من الشعراء الاولين اسمه علي بن
رشيد العازمي - رحمه الله عليه - عاش في قرية نفى في هاك السنين الاولى قبل
التمدن ويطلع الكهرب والسيارات تو الناس يمكن هالكلام قبل ستين سنة في
هاالحدود لكن هاك الحين ثياب الصغيرين كانت تخيط وتباع بالكورجة كل
عشرين ثوب يسمونها كورجة تباع سوا، وعلي بن رشيد هذا له ولد كبير اسمه
رشيد ولا عاش عندهم يمكن انه يوم كبر وصار رجال راح اشتغل في المدين وطلع
وبعد يمكن جا عقبه عيال وبنات وراحو وتفرقوا وهو على كبر سنة الله العالم انه
في السبعين رزقه الله بوليد وسماه محمد وصار هو القعدة يروح به معه ويجي به
ويخشه في البشت الى صار برد ذاك اليوم عن الهوا من محبته لولده والى بغى
يروح يصلي راح به والى صار فيه عزيمة راح به الله العالم انه ست سنين في
الحدود والى جا الشتاء ينومه معه في البشت ويغطيه أنا ما أدري أمه موجودة وإلا

لا لكن ما حن عليه بالحنان هذا الا يمكن ان امه مهيب موجوده ما ادري لكن يروح به والى جا في عزيمة يقطع له لحمه ويعطيه والا يعطيه تمره، والوليد هذا حليل ونبيه وذكي فيوم جا يوم العيد قام ابوه شرا ذاك الثوب الازرق ثوب تقدر تقول رقبته وسيعه شوي والثوب على قدده كنه مغسول عليه وهو واقف ازرق ويمكن هاك الحين يتقصون الناس في الخياط والا في اللون والشكل يمكن بعض الثياب الكم هذا والكم الثاني صاير افتح من الثاني بشوي مهوب يخالف كل شيء يمشي او يصير اسفله ضيق وبعض المرات اذا صار طويل مره يرفعونه مع الوسط والى غسلوه وكمش فتقوا الرفاع وغدا مكانه أبيض كل هذا مهوب يخالف وشارين للوليد طاقة ذيك الطواقي اللي يكتب عليها مكة المدينة طواقي قبل طواقي شالكي .

المهم يوم شروا له الطاقة كان باقي على العيد يوم او يومين وقالت وحده من اخواته وراكم لبستوه الطاقة قبل لا نحلقه ودوه يحلق يا ابوي حتى نغسل راسه ويزين وجهه قاموا وحلقوا الوليد المهم يوم حلقوه استاسعت الطاقة عليه صارت وسيعة عقب الحلاقة فقاموا وكفتوها من ورا تكفت الطاقة من وري ووترفع وتصير واقفة مهوب يخالف في القرى المهم الوليد في يوم العيد يدور مع العيلان ويطققون البيوت ابي عيدي عادت عليكم في حال زينة ويصIRON العيال من العشرة وفيها عددهم، ويصير مع العيلان اذا صارو عشرة تسعة لازم يصير واحد فيهم اكبر منهم بشوي يصير بعض المرات عبث ولعاب وهو اللي يفتن بينهم يخليهم يتهاوشون ويتطاقون بيناتهم، فيطقون على البيوت وكل ما طقوا لهم باب ابي عيدي عادت عليكم وتفويض عليهم من هالحريم والا العجز اللي تحط له شوي

حب واللي يعطونه ببض والا قريض فولد بن رشيد معه طاسه صغيرة معه قريض ويدور مع العيلان عليه الطاقية المنقشة بحمر وخضر وعليه ذاك الثوب الازرق ويدور، ولد بن رشيد ذكي ونبيه لاحظ العيال الباين كلهم أغلبهم عليهم غتر الا هو عليه طاقية بس والغتر من اول تباع بريال ذيك اللي مخططه باصفر ولاحظ بعد هو ما عليه غتره والى ذا الولد الكبير تقدر تقول شيطاني وغثيث قام جمع العيلان اللي اغلبهم عليهم غتر قام وخلاهم يصيحون على ولد بن رشيد مسيكنين ما عليه غتره مسيكنين صاح صاح هذا هو صاح وخلوه ييكي صدق وصاح قام وخذ الغضارة وراح لأبوه والى أبوه في الديوانية، أبوه في بيتهم له ديوانية فوق لها دريشة تطل على الديرة وأبوه كان عازم الجيران عازمهم على العيد ومسوي القهوة ومعه الدلال وشاب الجمر ويطقق بالمقاط ويستغل والاهم مولين لهم بادية جريش يبي يقلطوهم ما درى الا حس الوليد مع الدرجة جاي يصيح والى الولد وهو يرقى مع الدرجة مثل ما تقول الحريم البارح فارشين لهم حصير جديد بمناسبة ان اليوم العيد والحصير بالعادة يكون مطوي وتوه جديد ما بعد لبق صاير طرفه ملتف .

والولد وهو يرقى الدرجة مع الصباح والشهاق تعثر في طرف الحصير، وهالحين بعض العيال الى قام يصيح ما تهتم بصياحه يتل يصيح تقول بكيفه ولو يسكت يمكن تقوم تطقه حتى يصيح زود لأنك تحس أنه كذوب وبعضهم صياحه يكسر القلب ويحزن اللي ما فيه حزن كنه صياح يتيم المهم يوم رقى ولد بن رشيد والاه يكسر هاك العبرات ويشاهق وفيه ناتور من الصباح ويوم عثر في الفراش وينكب القريض اللي معه في الغضارة وقال أبوه بسم الله عليك ولدي ولدي محمد اقرب اقرب وراك تصيح وانا ابوك وش هاللقريض وحطه في الغضارة وقعه في حجر أبوه وقال وراك وانا ابوك تصيح . ؟ افا عليك وش بلاك تصيح يوم ناظره والى عيونه مغورقه بالدموع ويقوم أبوه وياخذ اسفل

الثوب ويمسح عيونه ووجهه ويخليه يركد لكن توه ما بعد ركد يشاهق سألـه قال
 وش فيك قال وهو يصايح ال ال ال العيلان قال وش فيهم قال كلهم يصيحون
 علي ما عليك غترة قال يعني تبي غترة وأنا أبوك قال ايه أبي غ غ غ غترة، والى
 الريال وين اول من يحصل الريال قام الابو تسلف من واحد من الجيران اللي
 عنده ريال والى مار راعي الدكان معهم حاضر في العزيمة اصلا الديرة كلها
 مافيهـا الا دكانين قال له حول افتح الدكان والله ما نخلي محمد يصيح وركض
 وفتح الدكان ويشقون غترة من الطاقة ويجييهـا ويلبسونها عليه بنشاهـا توها ما بعد
 لبقت بالحيل ويحزمونها على راسه يوم ركد الوليد وهجد عن الصياح وناظره
 والاه راكد قال هاه استانست وانا أبوك قال ايه عاد رأسه والغترة عليه جديدة كنه
 صندون شاهي مصندق ما بعد لبقت الغترة عليه زين قال ابوه هالقصيدة :

لا يا محمد دمعتك لا تحيري

اللي تبي جنباه سمح به البال

ارضيك يوم انك غرير صغيري

ابيـك ترضيني اذا صرت رجال

لا اجل انك اغلى من سواده نظيري

جنبنا لك الغترة من السوق بريال

عساك تسلم لي واخوك الكبيري

اعمالي انتم كان ما جالي اعمال

اما الى منه تدانا مسيري

والا ليا مني تشاويت الاعمال

يا رب تقبل توبة في ضميري
واغفر لي الزلات عن ماض الافعال
وان تجعل الفردوس غاية مصيري
امين يا منزل تبارك والانفال

الله يعفوا عنه ويرحمه وإن شاء الله الولد طلع طيب ويدعي
لأبوه، والحقيقة هذي من العادات الطيبة اللي دايماً يحرصون الناس في سبيل
يصيرون عيالهم صالحين . إن شاء الله ، وفق الله الجميع للخير وإلى لقاء .





غربة دباس

السالفة هذي عن الشاعر/ راشد بن عبدالله الدباس قصيدة أبو دباس المعروف ، وهو من أهل عودة سدير من الوداعين الدواسر ، وردت القصيدة في عدد من الكتب وكذلك رد ولده عليه ولكن مع الأسف ما يعرف عن هالشاعر العلم إلا هالقصيدة هذي بس ، يمكن أن قصيده ضاع أو ما دون وكذلك اللي فهت من بعض الرواة من أقاربه أنه توفي في عام ١١٦٣ هـ ، رحمه الله .

وأبو دباس مثل ما ذكرت لكم من أهل العودة اللي هي تقريبا من أقدم قرايا سدير صائرة في جهة الشرق في سدير بالنسبة للي رايح مع طريق القصيم أول ما يوافيه العودة ويجي عقب العودة العطار ويجي عقبها عشيرة ثم الخطامة ثم الجنوبية والجنيفي ثم الحوطة وروضة سدير والتويم اللي هي ديرة الشاعر/ محمد بن لعبون ، والشاعر/ إبراهيم بن جعيشن ، هذي القرايا اللي تقريبا في سدير وأقدمها العودة والحصون والتويم والدليل على قدم العودة موجود فيها بقية آثار قصر غيلان ذي الرمة الشاعر العربي المعروف ، الحاصل أن الشاعر/ راشد الدباس غاب عنه ولده دباس راح يدور العيشة ويركب الغوص ويتسبب في طلب الرزق على سواحل الخليج العربي وطولت رحلته أكثر من ثمان سنين فكان أبوه يرسل له وما يدرى الرسائل هي تاصل وإلا لا وحتى هو في مدة غيابة كان يرسل لأبوه مثل ما تقول هدايا ويواصله وأبوه ما تهمة الهدية .

الحاصل أنه يوم ابطى طبعا انزعج الوالد وكبر في السن كان ولده من اول يوم انه يروح وهو صغير الولد يمكن عمره دون العشرين وخايف عليه ابوه ومن أول كانت اسباب المعيشة كلها تعتمد على الله ثم على الحرف والمهن اللي يقوم

بها أرباب البيوت والعوايل على قول المثل (من زندك وإلا مت) كل الناس
 يشتغلون بالحرف كل يشتغل بالمهنة اللي هو يجيدها، الولد يوم طول في غياهه بدا
 الابو يضعف شوفه ويقل حيله وحس ان لا بد من وجود ولده عنده وبعد اللي
 ضيق صدره زياده وخلاه يكتب القصيدة ان من اول كانت النخيل ما يجيها السيل
 الى جا مطر ما ياصل النخيل الا بالتعب والغثى وبعضه بالقوة يتطاقون عند
 مفارق السيول وعند مدخال السيل دائما يصير مشاكل ومع الأسف اقاربه او
 ربه واللي حوله يوم كبر وشيب ولا صار فيه حيل بدوا يضيقون مجرى السيل
 حق نخله لين ما صار يجيه شي فكتب القصيدة يشكي الحال على ولده ويتألم من
 الوضع اللي هو فيه ويوم يروح الولد وهو صغير وابوه يخاف عليه ينحرف يروح
 منا وإلا منا لا سيما وأنه سنه قابل للانحراف لا سمح الله وفي ديرة غربه فقال
 أبوه هالقصيدة هذي اللي مطلعها يقول:

يا ونة ونيتها من خوا الراس

من لاهب بالكبد مثل السعيرة

ونين من رجليه غدت تقل مقواس

يون تالي الليل يشكي الجبيرة

وياحمس قلبي حمس بن بمحماس

ويا هشم حالي هشمها بالنقيرة

ويا وجد حالي يا ملا وجد غراس

يوم اثمرت واشفى صفا عنه بيره

على ثمر قلبي سرا هجعة الناس
 متنحر درب عسى فيه خيرة
 الله يفكه من بلا سو الاتعاس
 ومن شر عبثات الليالي يجيره
 في ديرة تقطعت عنه الارماس
 سبعين يوم للركايب مسيره
 لا والله الليي حال من دونه الياس
 حط البحر والبر دون الجزيرة
 عقب لسلوان وري العين وطاس
 وقلبي على فرقاه تسمع فريره
 يالله يا الليي رد من عقب ما ياس
 يوسف على يعقوب وابصر نظيره
 ترجع علي دباس يا محصي الناس
 يا عالم ما بالخفا والسريرة
 يا دباس انا ابوصيك عن درب الادناس
 ترى الذي مثلك يناظر مسيره
 اوصيك بالتقوى ترى العز يا دباس
 في طاعة الليي ما ينجيك غيره
 هذي ثمان سنين من رحت يا دباس
 لا رسالة جتني ولا من بريرة

يا دبّاس من عقبك ترى البال محتاس
وعليك دمع العين حرق نظيره
وعليك كني في دجى الليل حراس
اصبح على حيلي وعيني سهيرة

وكني اتخيله ابو دبّاس وهو قاعد يهوجس الى جا في هالليل جته الوساويس
وجاه ابليس دلا يلعب عليه ولدك راح منا ولدك انحرف، ويهوجس بعد في
امور عايلته وهالصغار يقول لا سمح الله لو تزل بي قدم واروح من يبي يرعاهم
ومن يرعى ظروفيهم ولو رحت عنهم ادوره واغاب قالوا راح عن عياله بس فك
عمره ولا عليه الا من نفسه ويكمل ابو دبّاس :

اصبح وانا ما بين طاري وهو جاس
وطواري تطري علينا كشييرة
مثل الوحش قلبي على كف حبّاس
يكفخ كما طير سبوق القصيرة
متحير من عيلة البيت يا دبّاس
ارجي ثواب الله واخاف المعيرة
اخاف من حكي العدائم الانجاس
اهل الحكايا الطائلة والقصيرة
ويقال خلا عيلة عنز^(١) الراس
اقفى وخلا عيلة له صغيرة

(١) عنز: أي زين نفسه ولا عليه من أحد.

والا فانا يا ابوك قطاع الارماس
 منيب مشبور ورجلي قصيرة
 اصلك لو دونك نبا حمر الاطعاس
 الصلب والصمان دروب عسيرة
 مهالك مدارك مابها اوناس
 الا الثعل والبوم تسمع صفيره
 لاركب على وجناً من الهجن عرماس
 فجأ النحر يا دباس حمراً ظهيرة
 متروسة الفخذين مزبورة الراس
 كن الخلاص عيونها يوم اديره
 والا كما ربدا تخفق للاوناس
 وان رفعت جناحها مستذيرة
 تنشر من العودة على وقت الانفاس
 عند العصر والليل مقفٍ مريره
 والعصر بالصمان تسمع لها اضراس
 حبل الرسن خاطر تبتتر جريرة
 نهار ثالث بين حما والارواس
 وآره يمينك جعل لها لك سفيرة
 ثم ارتحل ساجية تقلب الراس
 تمشي باهلها فالبحور الغزيرة

لمسكة الفيحاء بها الخير محتاس
 لولا البدع والبعد يا وي ديرة
 فيها الطبخ وراهي الخبز يا دباس
 يقعد خوي الراس خنة خميره
 هي ديرة اللي باغي كيفية الراس
 ولا له حد همه من الناس غيره
 هيس ولد هيس للاصحاف لحاس
 يفرح الى نيدي لذبح النحيرة
 وذا ماقف يادباس مافيه نوماس
 يصلح لقن مهنته طق زيره
 ترى الفداوي دون وانت انشد الناس
 راعيه ما يذكر بخير وغيره
 ماله سوا حذو الحنك منه والياس
 واليا انقطع خرجة فلا له ذخيرة
 طلب المعيشة بالحرثة والاجناس
 والمشتري والبيع يوصف وغيره
 قم وانهض العيرات مع كل فراس
 يا دباس دور خير تستشير
 جدك وعمانك هل العزم والباس
 اهل المكارم مكملين القصيرة

يا دباس ما يصبر على البق والحاس
 الا الذي ماله بنجد عشيرة
 واليوم يامروي شبا كل عباس
 يا مسندي لطام وجه المغيرة
 عشرين عام كلها ارجيك يادباس
 مثل الغرير الي تولع بطيره
 عدل المناكب هيلع فرخ قرناس
 يميناه في لطم الحباري شطيرة
 عاتق خلوج^(١) روحت عقب مرواس
 وقت العصير لبيضها مستذيرة
 والليل جاه وحال من دونه الياس
 وروحه على فرقاه فرت فريرة
 يا دباس انا يا ابوك مانيب بلاس
 مير ان عيلات الرفاقة كثيرة
 جنبت وسط السوق وامشي مع الساس
 واخذ شوي الحق واترك كثيرة
 يا دباس لو روحت لي دحب الاكياس
 مختلفة ما بين زر ونيرة
 مالي بها يا جعلها بالف قباس
 يا جعلها تذهب ولو هي كثيرة

(١) الخلوج: هنا الحباري الخائفة.

يا دباس قلبي كل ما هب نسناس
 شرقية هبت بقلبي سعية
 والحال يا فرز الوغا مسها الباس
 عليك يا ناطح وجيه المغيرة
 وغصون قلبي يا فتى الجود يباس
 غادي انا يا ابوك كني هشيعة
 من شافني يقول ذا فيه لساس
 واللي برا حالي الهي خبيره
 لا وعلى من قبل غوال الانفاس
 ومفارق الدنيا يجينا بشيره
 عسى يطق الباب والناس غطاس
 يا والي القدرة عليك تعبيره
 صلاة ربي عد ما هب نسناس
 على النبي عدة هبوب المثيرة

هذي هي القصيدة بالكامل اللي قالها الشاعر / راشد بن عبدالله دباس
 ارسلها لولده دباس في الغربة، ويوم وصلت له تأسف غاية الاسف وتحسف على
 تفريطه من ناحية أبوه وهو يعرف انه ماله الا هو وغايب ثمان سنين عنه، فتألم
 الولد وعزم يرجع وارسل قبل لا يرجع بعض الهدايا تخفف شوي من المعاناة
 وتمتص غضبه، لكن الأبوطاحت به الامور وشيَّب جالس في هالديوانية شايب
 كبير ببشته وعنده البنات يراكضون حوله لكن ماش اذا جا السيل ما ياصل

لنخله ، الحاصل يوم وصلت القصيدة عند دباس رد دباس على طول قال
القصيدة وارسلها لابوه يقول فيها :

حي الجواب اللي لفانا من الراس
جابه غلام ما توانا مسيره
اهلا هلا به عد ما حبك قرطاس
او ما كتب به من بيوت شطيرة
جواب من هولي مود من الناس
ابوي ما يوصف حلي لغيره
فرز الوغا كنه على الوكر جلاس
قروم ربعه كلها تستشيريه
مهف الغنم لاهل الركائب والافراس
الى لفوا بيته عليهم قصيرة
راعي معاميل بها العبد جلاس
للبن يشري بالسنين العسيرة
هذي مراكيها وهذي بمحماس
وهذي يصبه للوجيه السفيرة
وخلاف ذا يا راكب فوق عرماس
مامونة من نقوة الهجن عيرة
حمرا وهي في سنها وقم الاسداس
بيضا ولا فاطر ولاهي صغيرة

ما هي لحوح راكبه بالعصا قاس
حرم عليها غير شيل النجيرة
والخرج هو بيوت جيل بقرطاس
مع مزهب ايام ماهي بالكثيرة
فوقه غلام منوته قطع الارماس
لو هو بليل ما تغير نظيره
والى وصلت الدار فاجهر بالاحساس
وبلغ سلامي كل ذيك العشيرة
واختص ابوي اللي نفل جملة الناس
وخصه بعلم وقل تراني بشيرة
لا يا نقى العرض يا ابوي لا باس
ان كان تشكي الضيم فانا اسيزه
وان سايلك عني تراني بنوماس
وانا احمد اللي ما توسلت غيره
المدح لو يشرى شريناه باكياس
وباموالنا نرخص ندور الستيرة
مطرق فرنجي مضاريه الراس
ومصلبخ جبته عساني ذخيرة
ابغيه للي حادينك على الساس
اهل النمايم والحكايا الكثيرة

ربع نوا فيك الردا والتخساس
 مهبول ياللي قال غايب عشيرة
 علي نذر لاودع الجمع ينحاس
 لين العشير يقوم يشتم عشيره
 يا ابوي انا ما رحت ابي كيفه الراس
 مع ذا ولاني في سفاه وغيره
 اما سكنا الدار من غير هو جاس
 والا نعاف الدار وندور غيره
 كله لعين كلمة قلت يا دباس
 تشكي وانا دوني بحور غزيرة
 خذ لك يمين الشرع قطاع الانفاس
 انه فلا جتني علوم بصيرة
 لا مرسل جاني بحبر وقرطاس
 ايضا ولا جتني علوم سفيرة
 ان كان تشكي الضيم يا ابوي لا باس
 جاك الفرج يا ابوي هو والبريرة
 والا فاننا يا ابوي قطاع الارماس
 اصبر على الشدة ولو هي عسيرة
 يا مسندي يا ابوي شوف اوكد الناس
 ثم انشده قل ويش هو في مسيره

ان كان ما يفرح صديقك بنوماس
 تحرم علينا اللي نهوده صغيرة
 مجمول مدلول زها زين الالباس
 هي بنت من يثني خلاف الكسيرة
 طار يقول اظهر وطار بجلاس
 قمت اشرب التنباك واثره نكيرة
 ارجي عسى لي يبرد القلب يا ناس
 من لاهب هبت بقلبي سعييرة
 ومن كان له غايب فلا يقطع الياس
 ان يسر الله جاب علمه بشيره
 في ساعة اللي قلت والناس غطاس
 يا والي الدنيا عليك تعبيره
 وجدي عليكم وجد من باللقا قاس
 خلي طريح قدم وجه المغيرة
 او وجد من شوح لبلده ولا قاس
 بتيلهم بان الخلل في مسيرة
 صلاة ربي عد ما هب نسناس
 على النبي عدة هبوب المثيرة

هذا رد الولد وعقب ما ارسل الرد مشى الولد ويقولون انه وصلهم في ليل
 ويوم وصل في الليل سبحان الله أبوه توقع انه يبجي ودايم الأبو يستحسن، ويوم

وصلهم والى والله طوارفه من اقاربه رادين السيل عن نخل ابوه وبدا يشتغل
الولد علشان يوصل السيل للنخل وصارت هوشه عند مدخل السيل للنخل
انتصر فيها دباس ودخل السيل على نخل ابوه وراحت وحدة من بنات الابو
تنادي ابوها ييه ييه السيل دخل علينا، لان ريحة السيل يوم جا شال قشاش
العشب والائل وبنات ريحة المطر وياخذون السراج ويوم طلع الى والله السيل
داخل عليهم، ويقول لبتته ناظري السيل يا بنتي قالت فيه اثر دم قال بس هذا
دباس وصل والى فعلا دباس جا. وهذا اللي سمعت يجوز يكون فيها خطأ او
نقص اوزود هذه الرواية هي اللي سمعتها من كبار السن من أهل ديرته
والله أعلم. وإلى لقاء آخر.





الصقر الجريح

السالفة الأخيرة في هذا الكتاب سالفة قصيدة للشاعر فهد بن عبد العزيز الفايز، جا يوم من الأيام سير على قريب له مبط ما شافه ويوم جا للبيت فتح الباب احد العيال قال وين ابوك قال رايح ويبي يجي هالحين تفضل ادخل تقهوه الين يجي حياك الله، والى منول ما فيه جوالات تسهل الاتصال قبل يسير الواحد ويشوف ظروف رفيقه تسمح بالزيارة والا لا او نه موجود والا طالع لأنه اليوم والحمد لله اللي سخر لنا الهاتف وخاصة الجوال ما يكلفك شي تتصل وتسأل عن رفيقك، لأن بعض الناس الله يهديهم ما تدري الا وهو طاب عليك هو فاضي والى طرى له قال ابسير على فلان، طيب انت ماتدري عن رفيقك وظروفه يمكن انه في حال ما يبي يشوف احد اما وده ينام او مشغول بالبيت جدا ولا يبي احد يقطعه عن شغله او ان عنده احد الرجال اللي هو واياه عندهم سالفة خاصة وما اشبه ذلك، الحاصل ان الشاعر فهد الفايز دخل والى بالمجلس ولد الرجال رفيقه اكبر العيال متزوج وله ولد اسمه فهد، ابو فهد هذا قاعد يعالج له فرخ قرناس وفهد يشوف الدم يسيل من جناح الصقر، هاه قال خير يا ابو فهد سلامات وشبه هالطير الزين وش حاصل له قال ابد والله رحت انا ورب لي نترمي رحنا لمكان بعيد بالحيل جبال شاهقة وهي محل طيور وشفنا لنا هالطير ورميته بالبندق وصوبته وانا اعالجه هالحين مثل ما تشوف.

هاه فهد الفايز رجال شاعر ويعرف ان الصقر ما يصاد بالبندق انما يشبك او بطريقة ثانية اهل الطيور يعرفونها، هالمنظر والقصة هيضت الشاعر وقال القصيدة التالية :

الا يالله عليك الاتكالي
 وذكرك بادي في كل حالي
 ابجيب القلم بالحال واكتب
 واهيض من ضميري ما طرا لي
 الا يا بو فهد جاوب وعجل
 الى مني نشدتك عن سوالي
 وش اللي صار للضيف المبرقع
 صويب طاح ما ينساه بالي
 حبس البيت من عقب الشواهد
 رماه اللي يثور ما يبالي
 رماه بندقه والله حسيبه
 يحسب انه على قربه قحالي
 والى دمه على الريش متنثر
 عسى ما هوب فال لك وفالي
 عطيب الجرح ما ينهض جناحه
 يا كيف الحر يرمى بالمفالي
 يبي يكفخ ولكن ماش قوة
 ولا له مقدرية واحتيايالي
 تذكر كل يوم فيه رفرف
 يحوم ويدرج بين الجبال

وجاه اللي رماء وصاح صيدة
 وجابه صوغه للبيت تالي
 وقعد في مريضه يسحب جناحه
 على شوف الهوا ياهملاي
 الا يا بو فهد عطنا الصراحة
 وعمر الحي اخيره للزوالي
 لنا مدة طويلة ما سمعنا
 عن اخباره ولا جاله مجالي
 اخاف انك شويته ما تعرفه
 على ما قيل بامثال الرجالي
 افدنا بالسنافي هات علمك
 ولا تزعل علينا وانت غالي
 ترا المقصد نبي نضحك ونمزح
 معك والا انت اعدك من عيالي
 وصلاة الله مني والسلام
 على الهاد البشير اول وتالي

هذي سالفه الصقر الجريح اللي صورها الشاعر فهد الفايز اجمل تصوير
 وعرفت بعدين ان الطير مات وارتاح الصايد والمصيود .

وللشاعر فهد الفايز كثير من القصايد الهزلية منها انه مرة راح هو وولده
 يدورون سيارة يبي يشتريها وكل ما دخل معرض او مشى بين المعارض شاف

صورته وهو كن بطنه شوي كبير زايد وزنه ولا جاز له منظر بطنه وده انه اصغر شوي وهو قد عاهد نفسه انه يسوي حمية و تمارين لكن يمكن انه ما استمر على الرياضة والحمية ، وهو قد شاف بالتليفزيون مطربة مشهورة يسمونها ننسي عجرم اظن والا انا مالي بهالسوالف لكن نشدته وش ننسي هذي وعلمني انها مطربة يقول ان لها خصر دقاق وسع قفل السيكل مالها بطن ، وبعد قد مر على عمارة الفيصيلية ومعجبه زينها وتصميمها ماهوب سهل ، الحاصل عاد يوم انه شاف صورته بالقزازه قال الايات التالية :

وانا امشي شفت بطني بالمراية
 وفجـعني منظر زوّد عنايه
 الى جيت اصفه لاقول وصفه
 مثل بالون حقين الدعاية
 ومثل حامل جنين بتسعة اشهر
 يبين ولا تخفيه العباية
 لو انه بالذهب مليان كله
 شريت الفيصيلة من غنايه
 ولكنه واكرم كل سامع
 والسبب
 تعبت ولا قدرت اقضي عليه
 الا يا ناس وين القى دوايه

الا يا ناس من يفرزع لحالي
 ترا صبري وصل حد النهاية
 الى قيل امش واهتم بريضة
 مشيت الفين لكن ماش غاية
 والى قالوا قليل الاكل يكفي
 اذوق من الغدا واترك عشايه
 الا ياليت بطني مثل ننسي
 لها خصر كما راع الرواية
 بعد ما شاف ما خلاه يدعي
 الا يا عقاب هذا من بلايه
 يعنك ان التمني ما يفيد
 ومن ذي عادته زراع طاية
 الا يا صاحبي بشكي عليك
 ودقق يا الخوي باصل الحكاية
 حيث انك لمشكلتي طبيب
 وسمعت من البداية للنهاية



احد عشاہ القرص ومفطح الحيل

كان الشاعر / رشيد بن زيد الكثيري رحمه الله عايش في نخله في بلده (الحريق) وهو أحد اعيان قبيلة الكثران ورجل شهم وكريم وشجاع وراعي فضل على الآخرين وكان في نخله المسمى الرقيصيه له مضيف يكرم العاني والضيف والطرفي والجار وصاحب الحاجه ومعروف بين أهل ديرته وعلم من اعلام زمانه رحمه الله .

ولكن بعض المرات تمر على الانسان ظروف صعبه ما يقدر يكيف نفسه معها الحاصل أنه مرت عليه فتره شح الزمان وغربله الدهر فتقطعت معاويده اي أبله التي يصدر عليها في نخله (الرقيصيه) وقل الماء واجدبت قلبان النخل عموم والثمره في ذلك الوقت مقبلت على غايتها الحاصل انها ضعفت سوانيه وقل الماء ولا عاد يستطيع الصدر على السانيه . فضاقت صدره بالحيل وهو من الرجال المتعفين اللي ما يبي احد يدري عنه إذا حل به أمر مثل هذا يكتم في صدره ولا يبين عليه للناس شي كنه غني كما أنه له نفس عاليه لا يرضى بالخنوع او الشحذه أو يمد يده للناس مهما كانت ظروفه . وفي احد الليالي الصيف وهو في سطح بيته اللي في وسط النخل دايم البيت اللي يصير في وسط نخل يسمونه الاولين قصر . سمع صوت بعض السواني من النخيل اللي حول نخله في الحريق يسنون ما عندهم خلاف - يعني عندهم ماء في نخيلهم وهو ما عنده فتأثر من وضعه اللي هو فيه . ويتعجب من تدبير الله سبحانه في خلقه وارزاقهم ويقول قصيده يطلب الله سبحانه فيها الغيث لبلاده الحريق وان تحيا الغروس والنخيل المضاليل

التي زرعوها أهلها من أجل الجار والضيف العاني الذين اذا تاهوا فالصحاري
وألّفوا علينا نبذل لهم الموجود عندنا مما نتعب عليه ونكد من اجله من محصولنا
من التمر والعيش والذي لا نبخل به عليهم ابدأ وكذلك مما نشترى لهم من القهوة
والهيل وغيره ونقوم بتحضيره لهم في معاميل القهوة التي هي رمز الرجولة أمام
الضيوف الهاشليين يعني اللي يلفون عليهم بعض المرات في ليالي الشتاء القارصة .

كما يذكر في معنى القصيدة أننا نصبر على مرّ الدهر وحلوه اذا بلينا ولكن
لله في ذلك شؤون فيطلب من الله سبحانه بان يعدلها عن الضلع والميل لأن
الناس ما هوب واحد في مستواهم المعيشي فيقول أحدٍ عشا قرص البر اللذيذ مع
مقاطيع اللحم الحيل واحد لا عصيده فقط (الذره مع الدخن) الذي يحرك الكبد
ولا بد من شرب الماء بكثره وراه واحد يلاعب زوجته الفتاة الصغيرة واحد ما
عنده الا عجوز يابسه يذوق منها الويل يقول في القصيدة رحمه الله .

أرجيك ربي صادقات المخايل

تعم شعبان الحريق ومجره

تسقي لنا هذب الغروس المضاليل

اللي بها للجار حق ومبره

فالليل لا جونا ضيوف مهاشيل

نبذل لهم مجهودنا لونا نظره

ندق نجر بين سمر المعاميل

لو كان ما بالجيب مثقال ذره

نصبر على ضيم الدهر والغرايب
الى تبلنا كف الله شره
الله يعدلها عن الضلع والميل
ولا يميلها على الناس مره
احد عشاء القرص ومفطح الحيل
واحد عصيد يلعط الكبد حره
واحد يلاعب لابسات الخلاخيل
وأنا عجوز ذقت منها المضره

هذه هي سألقت رشيد بن زيد الكثيري رحمه الله وقد رواها لي الأخ الكريم
الفاضل ابن عمه العمده في حي السويدي بالرياض راشد بن محمد الكثيري في
٢٨ / ٩ / ١٤٢٦ هـ.

حببت اوضح القصيدة لان فيها تداخل في القافية مع قصيدة لشاعر من اهل
الشمال اسمه / خضير الصعيليك الشمري اللي مطلعها:

البارحه يا شعيل يا حيل ابا حيل
النوم عن عين المخاليق فره

وسلامة الجميع .



الغويش اليتاما

الشاعر/ محمد بن مسلم اصله من أهل حوطة بني تميم عاش في الإحساء ومات فيها عام ١٢٨٠ هـ رحمه الله تزوج في شبابه بامرأة عاقله رزينه ساعدته على مشاق الحياة وصبرت واحتسبت وهي تتقاسم معه شقاء العيش عاشت معه أربعة عشر عام كأنها عنده أربعة عشر يوم من عمق محبة لها وعمق انسجامها معه وتوافق طبيعتهما المنجبت له أبناء وبنات متتالين في أعمارهم حيث كانوا مثل الغوش (الغوش في المفهوم الشعبي) الأبناء الصغار السن الذين يكون عددهم عادة أقل من الستة في العدد.

زوجته توفاه الله سبحانه بعد مرض عضال في ثاني أيام رمضان وقد كان رحمه الله لم يذخر في سبيل علاجها شي ولكن قدره الله سبحانه فوق كل شيء فحزن لفراقها حزن شديد وكثر انينه وسالت دموعه مرات عديدة فنظم قصيدة عصماء في رثائها أخذت ترددها الرواة والمهتمين لقوتها ومصداقيتها ولما فيها من المعاناة التي تحملها الشاعر ابن مسلم في فراق زوجته وشريكة حياة طوال ١٤ عام تطرق في القصيدة لسيرتها الحسنة وذكر ما حسن به من الفراق والآلام وكثر الدعاء لها بالرحمة والمغفرة من الله سبحانه ودعاء بان ينبت على قبرها بعد المطر الزهور من البختري والنفل والخزما وبين بان جيرانها في البيوت حزنوا لفقدائها وذكر معاناته إذا أبنائها اليتاما وهم يبكون وخوفه عليهم من يتيهون في السكة والامكان من الهيام عليها.

وان مشكلة التي يعاني منها بعد وفاتها هو أنها أصعب من لو كان يريد الزواج وهو شاب فالآن أصبحت أعظم لأنه عارف أنه يتعب ما راح يلقي الزوجه

التي تصبر على ابنائه الصغار الآن بعد وفاة والدتهم من يقبل بهم وتربيتهم وملاحظتهم وهم كلهم صغار سن ويخشى أيضاً أن يتزوج بواحدة تكون أمامه صالحة وفي غيابه طالحة فلما يقولون له ربه تزوج الحرمة بدالها حرمة ما يطيع يقول أبي حرمة فيها خوف من الله تلاحظ عيالي قبل ما تلاحظني أنا يخاف من وحده تزجر عياله بالهوش وهو تجرعه الغيض والمركلها هذه الصفات ذكر في قصيدة التي رثاء بها زوجته .

والتي طبعت في أولكتاب ظهر في نجد عام ١٣٧١هـ (خيار ما يلتقط من شعر النبط) لمؤلفه عبدالله بن خالد الحاتم وقد ذكر في هذا الإصدار اثني عشر قصيدة لمحمد بن مسلم رحمه الله وكذلك ذكرت في المخطوطات القديمة التي بعضها لم يطبع وهي معروفة لدى الكثير من الرواة الثقات .

وقد أخطاء من نسبها للشاعر/ نمر ابن عدوان لكون نمر عاش في البلقاء ديرة بني صخر فالشام وقد توفي عام ١٣٠٠هـ وقد رثاء زوجته وضحاء السبيله التي قتلها هو بالخطأ وهي تربط الفرس ورثاها بحوالي ستة عشر قصيدة ليس هو في حاجة أن يأخذ قصيدة ابن مسلم وقد طبع عن نمر، الاستاذ/ روكس العزيزي كتاب عن حياته وأشعاره ولم يذكر هذه القصيدة فيه وكذلك واحد آخر من العدوان لم يذكر أيضاً ثم أن اللهجة تختلف والطبيعة هذا طبيعة بدوية وابن مسلم عايش بين الحضر في مدينة الاحساء لأنه يقول في أحد البيوت والله بالولاءها لبزور اليتاما واخش من (السكه عليهم يضيعون) يعني ان عيالها كثيرين ويخشاء عليهم أما زوجة الشاعر/ نمر بن عدوان لم تأت إلا بعقاب وسلطان وذاكرهم هو في أحد قصايدده اللي قالها في رثاء وضحاء السبيله :-

أما الشاعر/ محمد بن مسلم فقد قال في رثاء زوجته :

البارحه يوم الخلاق نياما
بيحت من كثر البكاء كل مكنون

قمت اتوجد وانثر الما على ما
من موق عيني دمعها كان مخزون

لي وتنن من سمعها ما يناما
كني صويب بين الاضلاع مطعون

والا كما ونت كسير السلاما (١)
خلوه ربعه للمعادين مديون

في ساعت قل الرجا والمحاما
فيما يطالع يومهم عنه يجفون

والا فونت راعي الحماما
غاد ذكرها والقوانيص يرمون

تسمع لها بين الجريد انحطاما
من نوحها تدعى الحمايم ينوحون

والا خلوج سايفه للهياما
على حوار ضايع في ضحا الكون

والا حوار نشقوا له اشماما
وهي تطالع يوم جروه بعيون

يردون مثله والظوامي احياما
ترزموها معها وقاموا يحنون
والا رضيع جزعوه الفطاما
أمه غدت قبل اربعينيه يتمون
عليك ياللي شرب كاس الحماما
صرف بتقدير من الله مازون
جاء القضا من بعد شهر الصياما
صافي الجبين ابثاني العيد مدفون
خطوا عليه من الخرق ثوب خاما
وقاموا عليه من الترايب يهلون
راحوا بها حروة صلاة اليماما
عند الدفن دعا لها الله ويدعون
برضاه ولجنة وحسن الختام
وادموع عيني فوق خدي يهلون
خطوه في قبر عساه الهياما
في مهمه من عزب الأموات مسكون
يا حفرة يسقي نزاه الغماما
مزن من الرحمة عليها يصبون
جعل البختري والنفل والخزاما
ينبت على قبر دفن فيه مصيون

مرحوم باللي ما مشأ باللاما
 جيران بيته راح ما منه يشكون
 واوسع عذري وان هجرت المناما
 ورافقت من عقب العقل كل مجنون
 من طيب خيم إلى ذكرته بلاما
 ومحاسن ما عنهن الناس يدرون
 أخذت أنا وياه سبعة أعواماً
 مع مثلهن في كيفه ما لها لون
 والله كنه يا عرب صرف عاماً
 يا عون الله صرف الأيام هالون
 وأكبر همومني من غويش يتاما^(١)
 وان شفتهم قدام وجهي يكون
 وان قلت لا تبكون قالوا علاماً
 نبكي ويكي مثلنا كل محزون
 قلت السبب تبكون قالوا يتاما
 قلت اليتم اياي وأنتم تسجون^(٢)
 مع العيال وكل جرح يلاما
 إلا جروح بخاطري ما يطيبون

(١) غويش: الأولاد الصغار.

(٢) تسجون: تنسون.

جرحى فنيح مثل كسر السلاما
 إلى عثم^(١) عنه الطبايب يعجزون
 قمت اتشكا عند ربع عداما
 وجوني على فرقا خليلي يعززون
 قالوا تجوز وأنسّ لامه بلاما
 بعض العذارا عن بعضهن يسدون
 قلت أنها لي وافقت بالولاما
 ولو بقا ثلثينهم ما يسدون
 وأخاف أنا من غاديات الذماما
 اللي على ضيم الدهر ما يتاقون
 أو خبلت ما عقلها بالتماما
 تضحك وهي تلدغ على الكبد بالهون
 توذى عياي بالنهر^(٢) والكلاما
 وأنا تجرعني من المر بصحون
 والله يلولا هالغويش اليتاما
 واخشاء من السكه عليهم يضيعون
 لا قول كل البيض عقبه حراما
 واصبر كما يصبر على الحبس مسجون

(١) عثم: إذا تعفن.

(٢) النهر: أي دأبم تنهرهم وتهوش عليهم.

عليه مني كل يوم سلاما
عدة زها الوارد حجيج يلبون
وصلوا على سيد جميع الاناما
على النبي يللي حضرتموا تصلون

واشتهرت هذه القصيدة بعد وفاة ابن مسلم شهرة واسعة وأصبحت تغنا في
السامري لجودتها وصدق تعبیرها وتأثيرها في قلوب الناس وفالسنوات الأخيرة
حصل أن حرفتھا بعض الرويات الخاطئة من قائلها الأصلي وهو كما ذكرت
الشاعر/ محمد بن مسلم من أهل الإحساء رحمه الله .





السيرة الذاتية للراوي:

✍ محمد بن علي بن شرهان من مواليد عام ١٩٤٩م في روضة سدير بالمملكة العربية السعودية - له أولاد وبنات، وأبناؤه/ خالد ثم أحمد وسعد وعبدالله.

✍ حصل على شهادة الثانوية العامة - القسم الأدبي عام ١٣٨٨هـ بالرياض، لديه اطلاع واسع وثقافة عالية في مجال الأدب الشعبي وبالأخص القديم، وخبرته طويلة في هذا المجال.

✍ يُعد محمد الشرهان من أشهر الرواة للأدب الشعبي في الجزيرة العربية والخليج، وذلك بشهادة عدد كبير من أساتذة الفكر والمعرفة والكتاب البارزين في الصحافة العربية وقد كُتب عنه الشيء الكثير.

✍ صاحب مشاركة مستمرة برواياته الممتعة وأسلوبه الجذاب من خلال طرحه للسائفة والقصيدة من خلال وسائل الإعلام المسموعة والمرئية في القنوات التلفزيونية المتعددة.

✍ شارك في عدد من الملتقيات الأدبية بدبي وأبو ظبي وقطر والكويت وصوت العرب وفي ليبيا والجزائر وإيران وكانت مشاركته متميزة في ملتقى ابن لعبون في الكويت عام ١٩٩٧م.

✍ يتميز الراوي محمد الشرهان عن غيره من الرواة بحفظه للأشعار القديمة والجديدة، وحسن لقائه للشعر وطرحه للمشاهد بالحركة وكل تعابير الوصف الممتع، وكأنك ترى فيلماً مصوراً أمامك.

✍ وثق اللهجة النجدية في الخليج في تسجيله لعدد ٩٦ حلقة من برنامج الراوي من خلال محطة قطر الفضائية خلال شهر رمضان المبارك مدة ثلاث سنوات.

✍️ عضو في الجمعية العربية السعودية للثقافة والفنون منذ عام ١٤٠٢هـ، وشارك فيها بعدة أمسيات أدبية شعبية، وكذلك في مهرجان الجنادرية السنوي.

✍️ شارك في عضوية لجنة التحكيم التي قامت بدراسة قصائد الردود على قصيدة لغز سمو الشيخ/ محمد بن راشد آل مكتوم مدة عامين ١٩٩٤ - ١٩٩٥م.

✍️ حصل على شهادة شكر وتقدير من سمو ولي العهد في عام ٢٠٠٣م وذلك على مساهمته القيمة في حفظ المصادر التاريخية الوطنية، ودعم جهود دارة الملك عبدالعزيز - رحمه الله - في هذا المجال.

✍️ تشرف بخدمة حكومة بلده مدة ٣٤ سنة منها عشر في جهاز الحرس الوطني والباقي في وزارة المالية وتقاعد مبكراً عام ١٤٢١هـ ليتفرغ للأعمال الأدبية الشعبية خلال وسائل الإعلام.

✍️ ألف ثلاثة أجزاء من كتاب سالفه وقصيدة، كل جزء يحتوي على عدد (٣٢) سالفه وقصيدة وموجود بالمكتبات.

✍️ له في الأسواق حوالي ثمانية عشر شريط كاسيت بصوته ورواياته الجميلة التي لا تخلو منها سيارة أي مسافر لما فيها من المتعة والتسلية والفائدة.

✍️ يحظى بقبول واسع عند الناس على مختلف طبقاتهم؛ لما يطرحه من مواضيع أدبية شعبية لا تثير حساسية أحد من الناحية القبلية والأصول أو الدين.

✍️ يشارك الآن في إعداد وتقديم برنامج الخيمة الشعبية الذي يقدم من إذاعة الرياض كل يوم خميس، وكذلك المشاركة في برامج شعبية أخرى.